

# 1 KORIYN

## Pol Minj Nind Ak Koriyn Biynimb Kuyip Tikak Minim Nind Niņep

Pol nind am dawin yomb Koriyn mindiy, kuyip minim angñek gunap Jiysis nup chingyak. Kisen biynimb Krays ker kun gok gunap mindrep ma giyak minim ak niņiy, minj biy kuyip tikyokak.

### **Minim Ar Keykey Mindip Rek:**

Minim nind angak ak mindip chapta 1:1-9.

Krays biynimb nuk gok asik keykey ayning giyak minim ak mindip, chapta 1:10-4:21.

Biyn siy bi siy minim ak sek, biyn bi dep akan ma dep minim ak sek mindip, chapta 5:1-7:40.

Biynimb yikop gok gipay miñ ar ak ginjun akan ma ginjun angiy angniņey, Pol kuyip minim gunap angak minim ak mindip, chapta 8:1-11:1.

Biynimb Krays ker Gor Kawnan gos ñimb rek niņiy penpen wasemb ay, pen dek pen dek giy, mindrep ginimimb angak minim ak mindip, chapta 11:2-14:40.

Krays kumiy tip tikjakak rek, biynimb nuk gok kunep giniņgambay angak minim ak mindip, chapta 15:1-58.

Koriyn biynimb Krays ker mindeyak gok, Jiwdiya biynimb Krays ker mindeyak gok kuyip maniy gunap di nan-giy yokyak minim ak mindip, chapta 16:1-4.

Minim angjiwning angak minim ak mindip,  
chapta16:5-24.

<sup>1</sup> Yand Pol. Gor yip wong angayak rek, bi Jiysis nup minim dand amemb bap mindpiyn. Miñiy mam chin Sosteniys yand yip mindiy,

<sup>2</sup> nimbip Koriyn biynimb Gor ker mindpim gok minj tiksipur. Gor nuk key nimbip biynimb suņ-tep yand mindeyaņ angiy dining mey, Ñinuk Biyomb chin Jiysis Krays nup yokek apiy gek, biynimb suņrep nuk mindpim. Kun ak nimbip minj tiksipur. Pen minim tiksipur kun biy nimbip nep ma aspur; Biyomb chin Jiysis Krays nup Biyomb angiy angniņbay gok kuyip maņgiysek aspur.

<sup>3</sup> Bapiy Gor yip, Ñinuk Jiysis Krays yip nimbip simb niņiy direp ginimiy.

*Pol Gor Nup Tep Angak*

<sup>4</sup> Pen Gor nimbip direp gip ak niņiy, nup per tep apiyn.

<sup>5</sup> Yenen: nimb Krays nup chingem, nimbip direp yimb gek, gos niņrep giy, minim angñirep gipim.

<sup>6</sup> Nimbip minim tep ak angñiyiņg angnuk rek nep gisap.

<sup>7</sup> Jiysis tip andkind winiņgamb angiy kond mindpim ñin biy, Gor nimbip direp yimb gakniņ, biynimb nuk ar keykey giniņgambay angak rek gipim.

<sup>8</sup> Nimbip direp giyiņg nep mindeniņgamb ak mey; ñin yomb nuk ak apek minim gunap ma diniņgambim.

<sup>9</sup> Gor nimbip di Biyomb chin Jiysis Krays yip jimñiy ayak ak niñbun: angak rek mañgiysek giniñgamb.

*Krays Ker Mindpim Ak Jimñiy Mindenimimb*

<sup>10</sup> Mam ay sikop. Krays ker mindpun ak, minim gunap angyiy asik keykey ma aynimimb; Gor nup gosimb ar nokom niñiy, jimñiy mindenimimb.

<sup>11</sup> Biyn Kilow biynimb nuk gok ap yip niñiy, penpen angyiy mindpim apay.

<sup>12</sup> Nimb gunap, Pol biynimb nuk mindpun apim; gunap, Apolas biynimb nuk mindpun apim; gunap, Piyta biynimb nuk mindpun apim, gunap, Krays biynimb nuk mindpun apim.

<sup>13</sup> Apim kun ak Krays nup tungasik keykey aypim rek ayip. Yip mon bak biyon ñangrimik ayey nimbip nen angyiy kumen rek, yimb yip angyiy Pol biynimb nuk mindpun apim. Pen Pol ker mindpun angyiy ñiñg piknimik? Chin Pol biynimb nuk, chin Apolas biynimb nuk apim ak; tom gipim!

<sup>14</sup> Pen am nimb yip mindenik ñin ak, nimbip bap ma ñiñg pikñinik. Kriypas yip, Gayas yip kuyip nep ñiñg pikñinik. Kun ak Gor nup tep apiyn;

<sup>15</sup> yikop ak nimb gunap Pol nup yimb angyiy ñiñg piknuk apkip rek ayip.

<sup>16</sup> Pen sakiy gipiyn. Stepanas biynimb nuk gok kuyip kunep ñiñg pikñinik. Biynimb gunap sek ñiñg pikñinik akan; sakiy gipiyn.

<sup>17</sup> Krays yip biynimb gok kuyip ñiñg pikñinimin angyiy ma angak; kuyip minim tep ak angninimin angak. Kun ak niñiy mey, minim tep nuk ak

anğñimbiyn. Pen anğñiyiñg, biynimb gunap chin nep gos tipañgiy niñbun anğiy apay rek, ma apiyn. Minim kun ak rek anğen, biynimb gok Biyomb chin mon bak biyoñ ñanğrimbikyak minim ak, minim yikop bap rek ayek, ma dipypap rek ayip.

*Krays Nuk Nop Gor Kilis Ak Sek Mindip*

<sup>18</sup> Yenen: Krays chinup anğiy kumak minim ak, biynimb mon key yinçap amniñg gi mindpay gok anğon niñiy, sakiy minim aspay anğiy kirpay; pen chinup biynimb Gor tunğasik kim disap gok minim kun ak niñiy, nuk key yimb niñiy gip anğiy niñbun.

<sup>19</sup> Ar kun ak Baybol buk ak tikiy anğyak, “Biynimb gos tipañgiy niñbun apay gok, key niñbay ar ak giy, biynimb yand ma mindeniñgambay anğip anğyak.”

<sup>20</sup> Kun ak biynimb gos niñep gok, biynimb sikul yomb ambay gok, biynimb minim yerip yerip anğ amiy apiy gipay gok minim yomb tep tep kiyk niñbay ak, Gor niñek, sakiy minim rek ayek, pisnep apyap pikniñg gispay.

<sup>21</sup> Gor nuk key niñrep gip rek, biynimb gosimb chin key okok niñjun anğiy, keynep piyow niñbay gok, nuk bi yerip rek anğiy ma niñbay. Yenen: nuk key giniñg niñayak rek, biynimb sakiy minim chin anğñimbun ak niñiy dipay gok, piksak dip.

<sup>22</sup> Pen Griyk biynimb gok gosimb tep tep ar gunap niñun anğiy per piyow niñbay. Jiwda biynimb gok apay, “Tap mageprek gunap gey niñiy, niñind apay anğniñgambun apay.”

<sup>23</sup> Kun ak mey, Krays chinup anğiy kumak minim ak anğon, Jiwda biynimb gok apay,

“Minim yiruk gip gok yerip aspim apay.” Griyk biynimb gok apay, “Gosimb tep tep chin piy-owninbun ar ak ma aspim; ñiñlonj ay apay rek aspim apay.”

<sup>24</sup> Pen chin Jiwda biynimb akan Jiwda mer, Gor dininğayn anğiy anğayak gok, Ñinuk nup yokek apiy kumiy, chinup di Nop yip jimñiy aysap ak; gos tipanğiy ninjy gak ak ninbun.

<sup>25</sup> Gor ninjy gip ar ak, gos ninrep giy ma gip rek ayninğamb ak pen; nuk ninrep giy ma gininğamb ar gunap mindonimuñ, gos tep tep chin ninjy gipun ar ak tapin wiyniyım gininğamb.

<sup>26</sup> Mam ay sikop. Nimb key ninjim! Gor biynimb nuk diyn anğiy, biynimb yimb mindek gok, biynimb tap lum ar biy ninrep yimb gipay gok, biynimb nop nonim yimb yomb mindyınğip gok kuñay ma dak. Nimbip biynimb yikop tam okok rek mindpim gok kuñaynep dek mindpim.

<sup>27</sup> Nuk anğak, “Biynimb sakiy sek apay gok kuyip dinikniñ; biynimb yomb mindpun apay gok, yimb sek mindpun apay gok nambinğek; gunap yip gosimb ninningiy anğak.”

<sup>28</sup> Kun ak biynimb yimb sek mindpun apay gok gos ninyanğ anğiy, kuyip kirgiy, biynimb tam okok yimb ma mindip apay gok kuyip dip.

<sup>29</sup> Kun gip ak biynimb bap Gor windin yirik ar ak, yimb key dand araniñgiy rek ma ayip.

<sup>30</sup> Gor Ñinuk Krays Jiysis nup chinup anğiy yokek apiy gek mey; nup chinğiy biynimb sakiy rek ma mindpun; biynimb suñ-tep kim kisenimb Gor dep rek gok mindpun.

<sup>31</sup> Minim ar kun ak, Baybol buk ak tikiy anğyak:

“Biyimb miñmiñ gun aᅅgiy key ma miñmiñ giniᅅgiy, Gor giᅅ rek niᅅiy, miñmiñ giniᅅgiy aᅅgyak.”

## 2

### *Pol Krays Chinup Mon Kiros Bak Biyoᅅ Kumak Minim Ak Aᅅᅅiᅅiyiᅅgiᅅ*

<sup>1</sup> Pen mam ay sikop. Am nimb yip mindenik ñin ak, Gor minim niᅅind yimb ak aᅅᅅiᅅiy aᅅgiy, minim kilrep wip gok ma aᅅᅅiᅅinik.

<sup>2</sup> Jiysis Krays chinup aᅅgiy kumak minim ak nep aᅅᅅiᅅen niᅅniᅅiy aᅅgiy,

<sup>3</sup> minim aᅅgrep ma ginim rek ayek niᅅiy, jep jep diyiᅅ, gos yomb niᅅyiᅅ nimbip aᅅᅅiᅅinik.

<sup>4</sup> Biyimb gunap minim key piyow niᅅiy, minim yindik andip andip ar kun ak nep rek aᅅgun aᅅgiy giᅅay rek ma ginik; Gor Kawnan ak yip gos ñakniᅅ aᅅᅅnik ak mey; misenᅅ niᅅnimimb rek ayak.

<sup>5</sup> Kun ak minim tep timey ar gunap niᅅiy, Gor nup gosimb ma niᅅbim; nuk biyimb diyn aᅅgiy key yimb giᅅ ak niᅅiy, nup gosimb niᅅbim.

### *Gor Gosimb Tep Tep Nuk Ak*

<sup>6</sup> Pen yand kunep biyimb Gor nup chiᅅgrep giᅅay gok niᅅiy, kuyip minim yipul yimb ak aᅅᅅiᅅimbiyn. Pen biyimb yikop gok, biyomb kiyk apyap pikniᅅ giᅅpay gok sek minim yipul kiyk biyimb aᅅᅅiᅅimbay rek ma aᅅᅅiᅅimbiyn.

<sup>7</sup> Minim yipul yand aᅅᅅiᅅimbiyn ak, Gor minim yipul yimb chinup dek, nuk yip mindrep giniᅅgambun ak aᅅᅅiᅅimbiyn. Nuk miñmon ma alwol gayak ñin ak, biyimb yerer giy diniᅅgamb

minim ak niŋak ak pen; minim kun ak weygyi rek mindyngip.

<sup>8</sup> Biyomb ñin namb biy mindpay gok minim kun ak ma nep niŋbay. Niŋbiyap rek aŋgep, Biyomb chinup direp yimb gip ak nup, mon bak biyoŋ ma ñaŋgbirik aypiyap.

<sup>9</sup> Pen Baybol buk ak tikiy aŋgyak, “Gor biynimb nup gok kuyip direp giniŋgamb. Windin ma niŋyak, aŋgñey ma niŋyak, kun giniŋgamb aŋgyi ma nep niŋyak ak; kuyip giniŋgamb aŋgyak.”

<sup>10</sup> Pen minim ma niŋyngipay kun ak, Gor Kawnan nuk ak chinup yokek apiy, gos ñek niŋbun. Yenen: Gor Kawnan ak Gor gip rek, giniŋgamb rek, maŋgyisek niŋimb.

<sup>11</sup> Chin gos yerip yerip niŋbun ak biynimb gunap ma niŋbay, chin nep niŋbun rek, Kawnan nuk ak kunep gip. Nuk Gor gip rek niŋy mey, chinup gos tep kun ak rek ñek niŋbun.

<sup>12</sup> Kawnan lum biy nimb bap ma dipun; Gor Kawnan nuk yokek dipun ak mey; chinup direp yimb giniŋgamb ak niŋbun.

<sup>13</sup> Bi gos tipaŋgyi niŋbay gunap, chinup minim kun ak aŋgey ma niŋbun; sikul aŋgyi ma niŋbun; Gor Kawnan gos ñimb rek minim kun ak niŋy mey, biynimb gok kuyip aŋgñimbun. Gor Kawnan minim aŋgip ak niŋy, biynimb Kawnan nuk sek mindpay gok kuyip aŋgñimbun.

<sup>14</sup> Pen biynimb Kawnan nup ma dipay gok, minim nuk ak aŋgon niŋey minim rek ma ayip. Kun ak Gor Kawnan ak kiyk yip mindiy, gos ñakniŋ niŋniŋgyi rek ayip; yikop ak niŋey sakiy minim rek ayek, niŋrep ma gipay.

<sup>15</sup> Pen biynimb Gor Kawnan yip mindpay gok, kinjen tep ar ak timey ar ak angyiy kasek niñiy, mindrep gey amek mey; biynimb gunap kuyip yenen kun gipim angyiy, angy giningiy rek ma ayip.

<sup>16</sup> Baybol buk ak tikiy angyak:

“Biynimb an rek, Biyomb chin gos timund nuk ak kun giy mindip angningamb. Pen biynimb an rek, nup gos winjikningamb angyak.”  
Pen Krays chinup biynimb nuk mindpun gok, gos nuk niñimb rek ñakniñ, niñrep gipun.

### 3

#### *Bi Gor Wong Nup Giñemb Gok*

<sup>1-2</sup> Mam ay sikop. Nind nimb yip mindenik ñin ak, Krays biynimb nuk mindyingipim ak pen; gos yomb nimb ak amyinyip tap man ar biy ker gok. Ñapan ñan tiy ñiñemb rek ak mindyingipim: biynimb yomb tap key ñimbay rek ma mindyingipim. Kun ak nimbip Gor minim gunap angninik, gunap angnen ma niñnimimb rek ayek ma angninik. Mindpun ñin biy kunep, tap lum ar biy gos niñyiny nep mindpim rek, Gor nup gosimb niñbim ak, ñapan ñan gosimb niñbay rek nep niñbim.

<sup>3</sup> Miluk niñiy, penpen angyiy mindpim ak; biynimb yikop gok gipay rek gipim.

<sup>4</sup> Gunap, “Apolas biynimb nuk mindpun apim;” gunap, “Pol biynimb nuk mindpun apim,” Kun ak nimb biynimb yikop gipay rek gipim.

<sup>5</sup> Apolas chirminay biyomb yerip rek mindor, minim kun ak apim. Chir bi yikop omiñal ak pen;



Gor angek, minim tep nup ak anğñor ninjiy nup dipik.

Pen chirupminay woŋ ar keykey anğayak rek gipur.

<sup>6</sup> Yip angek, miñmon nimb ak amiy tap yiŋ ak yimnik. Apolas nup angek kisen amiy, ñiŋ am mal dap, tap yimnik kun ak soŋgak. Pen Gor nuk nep gek jakak.

<sup>7</sup> Kun ak, chir bi yikop tap yiŋ yimiy, ñiŋ soŋgiy gipur ak, yimb chirup ma dand aranimimb. Gor gek jakak rek, yimb nup ak dand aranimimb.

<sup>8</sup> Biynimb tap yiŋ yimbay gok, biynimb ñiŋ dap sopay gok woŋ ar nokom yimb gipay ak mey, woŋ gipay gipay rek ninjiy, kuyip pey ñiniŋgamb.

<sup>9</sup> Chirminay Gor woŋ ak jimñiy gipur; woŋday nuk ak nimb mindpim.

### *Gor Korip Nuk Gayak Ak Nimb Mindpim*

Pen minim bap: nimb biynimb Gor ker mindpim gok, Gor korip nuk rek mindpim.

<sup>10</sup> Yip simb ninjiy dek, bi korip nup gep ak mindiy, korip sap yomb namb biyaŋ ak piñiyen, biynimb gunap apiy day day mindip gok kisen gispay. Pen ap korip kun ak giniŋ, niŋrep giy nokom giniŋgiy.

<sup>11</sup> Gor korip nuk ak, Jiysis Krays nup sap yomb namb biyaŋ pisnep piñiyip ak; biynimb gunap tuŋgiw yokiy, kisenimb bap piñiyiŋgiy rek ma ayip.

<sup>12</sup> Pen korip day day mindek gispay ak, biynimb gunap gol, siylpa, kamb teprep dapiy

giningambay; gunap mon alik tap tinjy monmon okok dapiy giningambay.

<sup>13</sup> Pen wong yerip yerip giningambay ak; Krays apiy sup ñek yinek, manjiysek niñningambay.

<sup>14</sup> Korip day kilis mindeningamb gok pey ñiningamb.

<sup>15</sup> Day pisnep yinpañ yowningamb gok pey ma ñiningamb. Biynimb korip yinpañ yowningamb day kun gok giningambay gok, nuk yip kim mindeningambay ak pen; simbgeprek korip yinek, tap ma mindip rek gok mindeningambay.

<sup>16</sup> Gor Kawnan nimb yip nep mindip ak, korip ñiluk miñgan tep nuk ak rek mindipim!

<sup>17</sup> Biynimb gunap Gor korip ñiluk miñgan nuk asikrep gep ak, gi timey geningambay, kuyip pen kunep gi timey giningamb.

### *Chin Nep Biynimb Gos Niñep Mindpun Anjiy, Ma Anjnimimb*

<sup>18</sup> Niñrep ginimimb. Nimb gunap gos yomb biynimb yikop gok piyow niñbay rek nep niñjy, biynimb gos niñep mindpun anjningambim ak pen; sakiy ayek kun anjningambim. Biynimb sakiy sek mindpun anjiy mey, gos tep ak piyow niñningambim.

<sup>19</sup> Pen biynimb yikop minim yomb yomb rek anjiy niñbay gok, Gor niñek sakiy minim rek ayip. Baybol buk ak tikiy angyak, “Biynimb gos tipangiy niñjy; niñrep gipun apay gok, Gor gek pisnep apyap pikningambay angyak.”

<sup>20</sup> Pen minim bap sek tikiy angyak, “Biynimb yikop gos tipangiy niñbun apay gok, Biyomb ak

nihek, minim junj bap ma mindip; yesek apay angyak.”

<sup>21</sup> Kun ak biynimb gunap kuyip, biynimb yomb mindpay angy yimb ma dand aranimimb. Pen biynimb akan, tap yerip yerip mindip gok, Gor nimbip niñiy gayek mindip.

<sup>22</sup> Yand Pol, Apolas, Siypas; mankumb biy; tap yerip yerip okok mangyisek; miñiy mindpim ak, kisen mindeningambim ak, akan kumningambim ak Gor nimbip niñiy gek mey; kun giy mindiy, kun giy giningamb.

<sup>23</sup> Pen nimbik Krays ker mindpim; Krays nuk Nop Gor ker mindip.

## 4

### *Bi Jiysis Minim Dand Amemb*

<sup>1</sup> Kun ak Apolas chirminay mey; bi Krays angek biynimb nuk gok kuyip kond mindiy, Gor minim tep ma niñiyngipay ak angnimbur.

<sup>2</sup> Bi wong giñemb gok, biynimb gunap kuyip kond mindeningambay ak pen, monmon giningiy rek ma mindip; Nop kiyk ak angak rek nep giningambay.

<sup>3</sup> Pen nimb akan; biynimb gunap yip angningambim, wong nuk monmon gip angningambim ak: yikop angningambim. Nuk wong tep gip angningambim ak, kunep yikop angningambim.

<sup>4</sup> Yand key mindrep gipiyn angyi niñbiyn ak pen; minim kun ak rek Gor nuk key angningamb.

<sup>5</sup> Kun ak miñiy minim kun ak rek ma angnimimb. Biyomb key apiy, minim kun ak rek

anġningamb. Weygiy gipay gok, misenġ gipay gok maŋgiysek misenġ anġningamb. Gos yerip niŋiy nup woŋg giñimbay ak kunep niŋiy anġningamb. Kun ak mey, ñin kun ak biynimb maŋgiysek gipay gipay rek kuyip minim tep anġningamb.

*Koriyn Biynimb Yimb Kiyk Key Dand Aranyak*

<sup>6</sup> Pen mam ay yand gok. Minim apiyn kun ak, Apolas chirmiŋay apiyn ak pen; nimbip anġñirep gispiyn. Nimb key gos tipaŋgiy niŋbun anġiy key tep gakniŋ, bi nimbip minim anġñimbay gunap kuyip yimb dand aranying, gunap kuyip ma kirginimimb aspiyn. Pen Baybol buk tikiy anġyak rek ginimimb; gos key niŋbim rek ma ginimimb apiyn.

<sup>7</sup> Gor nep gek biynimb nuk gok mindiy, gos sek mindpun. Pen gos tep niŋbun ak, nuk nep gek niŋbun. Kun ak yenen yimb nimbik key dand araniy apim, “Chin biynimb niŋrep giy, girep yimb gipun apim?”

<sup>8</sup> Pen nimb key niŋem, minim miker nimb gunap ma mindip! Chin mindrep yimb giy, biynimb yomb yimb mindiy, kiyn gok mindrep gipay rek mindpun apim ak pen; am Krays yip mindiy, kiyn mindrep gipay rek mindoniŋgambun ñin ak ma owip.

<sup>9</sup> Kun ak nimb mindrep gipim ak pen; chin bi Nop anġek Jiysis minim dand amemb mindpun gok, bi yikop rek ayek, chinup miluk niŋiy, biynimb kuŋay mindpay namb ak pikayon, kuyip nambiŋ gaŋ anġiy gos ak nep niŋbay.

<sup>10</sup> Krays nup gosimb niŋiy woŋg tapin gon, chinup niŋey bi sakiy rek ayip; pen nimb Krays

biynimb gos tipangiy niņep nuk gok rek mindpim. Chin bi sayn; nimb biynimb kalrimey rek ayip. Chin bi yimb sek mer; nimb biynimb yimb sek gok rek ayip.

<sup>11</sup> Wosrey tikiy, mind dand apiy miñiy mindpun ñin biy, chech ma mindiy, korip ma mindiy, yiwan giy, kuņam kinjik giy, kumemb rek ay, chinup per pik gey gey kosyam yimb mindpun.

<sup>12</sup> Keynep tiņiy yiwur giy, tap ñimbun. Chinup timey giy, aņġiwiy gey; pemiya ma apun. Kuyip pen Gor kond minden aņġiy, nup aņġniņbun.

<sup>13</sup> Chinup minim timey aņġey, pen minim sayn apun. Kun ak, chin silkul tap day day rek mindon mindon ñin biy wip.

<sup>14</sup> Minim tiksipiyn biy nimbip aņġiwiyiņg nam-biņ diniņġiy aņġiy ma aspiyn; ñapan yand aņġiy timund winġikiyiņg aspiyn.

<sup>15</sup> Pen Krays minim tep ak bi gunap aņġey ma dipik: yand nep aņġñenik niņiy dipik. Kun ak nimb ñi pañ yand. Nimb yip nap nimbik. Nimbip Krays minim aņġñiniņgambay bi gok kuņay yimb mindpay ak pen; nap nimbik ak yand nokom yimb.

<sup>16</sup> Kun ak nimbip aspiyn: yand gipiyn gipiyn rek niņiy ginimimb.

<sup>17</sup> Ar kun ak nep, Timotiy ñi tep yand Gor minim aņġñen niņrep gip ak nup yoksipiyn. Nuk amiy, Krays biynimb nuk miñmon keykey mindpay gok kuyip, per aņġñimbiyn minim ak, nimbip tip ak aņġñirep gek niņrep giniņgambim.

<sup>18</sup> Nimb gunap Pol nuk key ma winiņgamb aņġiy, alemb alemb ñiyiņg mindeniņgambim ak pen;

<sup>19</sup> Biyomb ak yaw aṅgek, kasek niniṅgayn. Am-jakiy, bi yimb kiyk dand araniy yip aṅsikoy gipay gok, kilis kiyk yerip rek mindip aṅgiy niṅningayn.

<sup>20</sup> Gor binuk yimb, nup chiṅgiy mindpay akaṅ; minim nep aṅgyiṅ gi mindpay aṅgiy niṅningayn.

<sup>21</sup> Kun ak yand apiy nimbip yerip ginim? Wasemb ay minim sayn aṅgnim akaṅ; minim yomb aṅgiy timund winjiknim?

## 5

### *Koriyn Bi Bap Nonim Andik Nup Dak*

<sup>1</sup> Yip aṅṅñiy apay, “Bi nimb bap nonim andik anup di mindip apay.” Pen biynimb Gor nup gosimb ma niṅbay gok, tap siy tap timey kun ak rek ma gipay.

<sup>2</sup> Namam kun gek, yenen kun gipun aṅgiy nimbip nambiṅ ma gip? Krays ker mindpim rek, namam kun ak nup aṅgem, nimb yip ma mindonimuṅ.

<sup>3</sup> Yand paryomb akniy mindpiyn ak pen, nimbip gos niṅyiṅ mindpiyn. Bi tap siy tap timey gip kun ak nup, yerginiṅgambun ak niṅbiyn.

<sup>4</sup> Nimb biynimb Krays ker mindpim gok, ap nan-giniṅgambim ñin ak, Biyomb chin Krays nimbip gos ñakniṅ, gos yand niṅbiyn rek niṅiy,

<sup>5</sup> bi kun ak nup aṅgem nimb yip lotiw ma ginimuṅ. Seytan nup ñin ar ak aṅg ayam nup gi timey gek; gos niṅiy, kor yomb niṅep ñin ak, Biyomb ker mindonimuṅ.

<sup>6</sup> Pen nimb bi tap siy tap timey gip ak yip jimñiy mindiy, mindrep gipun apim ak, tep ma gip. Biret

gining, tap yiys apay ak siskoy band gunap sesek ayey yomb yimb tan aranimb.

<sup>7</sup> Nimb biret yiys sek ma mindip rek mindipim gok, yiys timey ak maŋgiysek kirgiy, biynimb tep nep mindenimimb. Chin Jiwda kay Gor nup tap pik simboŋgyiŋgipun ñin ak, tap siy tap timey, tap yerip okok asik tep yimb giyiŋgipun.

<sup>8</sup> Kun ak rek, Krays chinup nen kumimb aŋgiy niŋbun biynimb gok kunep ginjun. Biynimb gunap nep tap siy tap timey gi yomey, kuŋaynep giniŋgiy rek ayip. Gos kun ak niŋiy, minim tep yipund giy ar ak nep aŋg amiy apiy giy, mindrep ginimimb.

<sup>9</sup> Nimbip minj tikiy aŋgnik, “Biynimb tap siy tap timey gipay gok yip jimñiy ma mindenimimb aŋgnik.”

<sup>10</sup> Pen nimb aŋgniŋgambim, biynimb Krays nup gosimb niŋbay gok, gosimb ma niŋbay gok maŋgiysek kirgiyaŋ aŋgiy asap aŋgniŋgambim. Pen ak mer. Biynimb nup ma diy, biynimb gunap tap kuyip gok chin nimb tikaŋ aŋgiy, biyn siy bi siy giy, tap siy diy, tap yikop gok gor chin aŋgiy aŋgniŋbay biynimb gok, man ar biy sikoy ma mindpay. Miñmon okok maŋgiysek mindpay ak, kuyip kirginjun rek ma ayip.

<sup>11</sup> Pen biynimb Krays nup diy mam ay chin apun gok tikjak, biynimb gunap tap kuyip gok yip nimb tikaŋ aŋgiy, biyn siy bi siy giy, tap siy diy, tap yikop gok gor chin aŋgiy aŋgniŋiy, biynimb aŋgiwiy, ñiŋg kilis ñimbis sakiy ay giniŋgambay gok; kiy yip ma taŋgiy, jimñiy tap ma ñiŋnimimb aŋgiy apiyn.

12-13 Biynimb Krays ker ma mindpay gok, yenen kun gipim angyi, angy ginjun rek ma ayip; Gor nep mey, minim kun gok rek kuyip angyningamb. Pen biynimb Krays ker mindpay gok, minim kun ak rek angyningambun. Kun ak, bi nimb tap siy tap timey gip kun ak nup angyem, nimb yip lotiw giying ma mindonimun.

## 6

### *Biynimb Krays Ker Kor Niñbay*

<sup>1</sup> Pen nimb Krays ker mindpim gok, mam Krays ker mindpay gunap kuyip damem kor niñningiy ak pen, yenen bi Krays ker ma mindpay gok kuyip damem kor niñbay.

<sup>2</sup> Chin Krays biynimb nuk mindpun gok, kisen biynimb yikop gok kuyip mangyisek, kor niñningambun minim ak ma niñbim? Kor sikoy kun ak key gem kunnimun ak pen; yenen bi Krays nup ma dipay gok damem, niñbay.

<sup>3</sup> Chin kisen enjol gok kuyip kor niñningambun ak, kor sikoy kun gok, key niñjun.

<sup>4-6</sup> Akan biynimb gos niñep bap ma mindek, mam gunap tikjak mam gunap kuyip dam, biynimb Gor nup gosimb ma niñbay gok kuyip angyem, kor niñbay. Nimbip nambin ma gip?

<sup>7</sup> Pen kor minek minek gipim ak, apyap pikning gispim. Nimbip timey giy akan, tap nimbip gok piling dey; kirginimimb ak pen, yenen kuyip dand kor ambim?

<sup>8</sup> Pen yergining, namam nimbik gok key timey giying, tap kuyip gok piling diyung gipim?



<sup>9</sup> Niņrep ginimimb. Gor biynimb timey gipay gok kuyip diy ma kond mindeniņgamb. Biynimb tap yikop aņņiņbay gok; biyn siy bi siy gipay gok; siņgilwaņ dipay gok;

<sup>10</sup> tap siy dipay gok; biynimb gunap tap kuyip gok chin nimb tikaņ apay gok; ñiņg kilis ñimbiy sakiy aypay gok; biynimb gunap kuyip aņgiwpay gok; Gor kuyip diy ma kond mindeniņgamb.

<sup>11</sup> Nimb gunap tap siy tap timey kun ak rek giyiņgipim ak mey; minim yomb mindek, Gor yip jimñiy mindep rek ma ayak. Pen Gor Kawnan ak nimbip gos tep ñek, Krays nimbip aņgiy kumak gos ak niņrep giy, nup chiņgiy, Gor yip jimñiy mindiy, biynimb tep nuk minim ma mindip gok mindpim.

### *Biyn Siy Bi Siy Ma Ginimimb*

<sup>12</sup> Pen nimb gunap apim, “Yerer giniņg giniņgambun; minim ma mindip apim.” Kun apim ak pen, ar gunap giy mindrep ma giniņgambun; ar gunap giy gos yomb chin ar kun anep amek, kisen mindrep ginjun rek ma ayiņgamb. Kun ak yand tap monmon gok ma giniņgayn.

<sup>13</sup> Nimb gunap pen apim, “Chinup koņgiy ayak rek tap ñimbyiņg nep mindeniņgambun apim.” Kun apim ak pen, Gor gek koņgiy ak sek, tap kun gok sek ma mindeniņgamb. Biynimb gayak ñin ak, biyn siy bi siy giniņgiy aņgiy ma gayak; yand kuyip direp giniņgayn, kiyk yip direp giniņgiy aņgiy gayak.

14 Nuk Biyomb kun ak key. Ñinuk kumek key yimb gek tikjakak rek, chinup kunep giniᅅgamb ak niᅅiy, mindrep ginjun.

15 Nimb niᅅbim: Krays junwon, chin ñin tomb day nuk okok rek mindpun. Kun ak yergiy, Krays day bap dand amiy, kinjeᅅram biyn gok yip pireᅅiy ayjun.

16 Baybol buk ak tikiy aᅅyak, “Jimñiy kiner mumbwak nokom ayniᅅgamb aᅅyak.”

17 Chin kinjeᅅram biyn gok kuyip ker ma mindpun; Krays nup chingiy biynimb nuk yimb gok mindpun.

18 Biyn siy bi siy gep ar ak asikrep ginimimb. Tap siy tap timey gunap gon kun ma gip ak pen; biyn siy bi siy giniᅅgambun ak, mumbwak chin key gon timey giniᅅgamb.

19 Pen nimb niᅅbim: Gor Kawnan nuk ak yokek apiy, chin yip nep mindpun ak mey, korip miᅅgan tep nuk rek ak mindpun. Kun ak key gos niᅅbun rek gun aᅅiy gos ak ma niᅅjun.

20 Chinup kosyam yimb tuᅅgasik dek biynimb nuk mindpun ak, yimb nup aranimuᅅ ar ak nep ginjun.

## 7

### *Bi Beriymiᅅay Gok Mumbwak Kiyk Nokom Mindip*

1 Yip minj tikiy minim apik ak, nimbip pen aᅅniᅅ gispiyn. Biyn gok bi ma diy, bi gok biyn ma diy giniᅅgambay ak tep.

<sup>2</sup> Pen minek minek biyn siy bi siy gey timey gip rek, biyn gok bi kiyk key mindakniñ mindeniñgambay; bi gok biyn kiyk key mindakniñ mindeniñgambay ak tep yimb.

<sup>3</sup> Pen nuñgumiy biynuk yip kining angek, yaw angyi kiningayr. Biynuk nuñgumiy yip kining angek, yaw angyi kiningayr.

<sup>4</sup> Pen nuñgumiy mumbwak ak nuk key mer: biynuk yip tap kiyk jimñiy. Biynuk mumbwak ak kunep nuk key mer: nuñgumiy yip tap kiyk jimñiy.

<sup>5</sup> Kun ak nuñgumiy angek, biynuk mer ma angnimuñ. Biynuk angek, nuñgumiy mer ma angnimuñ. Yaw angyi kinimiyr. Pen Gor nup gosimb nokom niñiy, angninyiñg mindor angyi, minim ang ar nokom ay, nup angninyiñg mindeniñgayr. Kisen tip ak kiningayr. Mer ak Seytan nimbip gek, gos gunap niñiy gem amek, apyap pikniñgambim rek ayip.

<sup>6</sup> Pen low minim bap kun giy ma mindip; yand nep aspiyn.

<sup>7</sup> Gos yand niñbiyn ak, yand yikop mindpiyn rek mindeniñgambim ak, tep yimb. Kun giy gos niñbiyn ak pen, Gor gos nuk key niñimb rek, chinup kilis keykey ñimb. Biynimb gunap kilis tep bap ñek, ar gunap key gipay; biynimb gunap kilis bap key ñek, ar gunap key gipay. Kun gip rek, nimb mañgiysek yand yikop mindpiyn rek mindenimimb angyi ma apiyn.

<sup>8</sup> Pen biyn piñ bi paranj mindpay gok sek, biyn palpal gok sek yand yikop mindpiyn rek mindeniñgambay ak, tep yimb.

<sup>9</sup> Pen biynimb gunap yikop mindiy, siy siy gun angyi gos ak nep apek, mindrep ma giningambay. Kun genimuñ, biyn gok bi kiyk keykey diniñgiy, bi gok biyn kiyk keykey diniñgiy. Mer ak namb kuyip biyañ mon rek yinek, mindrep ma giningambay.

<sup>10</sup> Biyn bi beryoñg gok, kuyip minim bap angyiñg gispiyn. Yand nep mer: Biyomb ak minim nuk. Biyn gok nuñgumiy sikop kuyip ma kiring amniñgiy.

<sup>11</sup> Pen kiring amiy bi kisenimb ma diniñgiy; yikop nep mindeniñgiy. Bi diniñg, am nuñgumiy nindnimb anup, tip ak diniñgiy. Bi gok kunep, biyn gok kuyip ma angyokniñgiy.

<sup>12</sup> Pen nimbip biynimb yikop gok minim bap angyiñg gispiyn. Bi Gor ker mindonimuñ bap nup, biyn Gor ker ma mindonimuñ bap nup nind di mindiy, “Mindoniñgambur” angek, biyn Gor ker ma mindip angyi, nup ma angyoknimuñ.

<sup>13</sup> Pen biyn Gor ker mindonimuñ bap, bi Gor ker ma mindonimuñ bap nup nind di mindiy, “Mindoniñgambur” angek, bi Gor ker ma mindip angyi, ma kiring amnimuñ.

<sup>14</sup> Pen bi Gor ker mindonimuñ ak, biyn Gor nup gosimb ma niñimb ak dipiyn angyi, ma angyoknimuñ. Yip mindiy, Gor ñin ar ak mindeniñgambiy. Pen biyn Gor ker mindonimuñ ak, nuñgumiy nup ma kiring amnimuñ. Yip mindiy, Gor ñin ar ak mindeniñgayr. Ñapan kiy tikniñgayr ak minim ma mindip; Gor dinimuñ rek nep mindeniñgamb.

<sup>15</sup> Bi beryoñg diy mindipay gok, nuñgumiy nep

Gor ker mindek, biynuk Gor ker ma mindiy, kilis giy nuᅅgumiy nup kiring amning gonimuᅅ; biyn yand anᅅiy ma dirbiknimimb, yaw anᅅem, amnimuᅅ. Mer ak penpen giy, mindrep ma giningambim.

Pen biyn ak Gor ker mindek, nuᅅgumiy Gor ker ma mindiy, kilis giy biynuk nup kiring amning gonimuᅅ; bi yand anᅅiy ma dirbiknimimb. Yaw anᅅem, amnimuᅅ. Mer ak penpen giy, mindrep ma giningambim. Biyomb chin ak kapkap mindrep giyaᅅ anᅅiy chinup dip.

<sup>16</sup> Pen nimb biyn Gor ker mindpim gok, naᅅgumiy yip nep mindem, Gor nup chingningiy rek ayip ak: ma niᅅbim? Nimb bi Gor ker mindpim gok, biyn nimbik yip nep mindem, Gor nup chingningiy rek ayip ak; ma niᅅbim?

<sup>17</sup> Biynimb Gor ker mindpay miᅅmon okok maᅅiysek, kuyip per apiyn, “Nimb yerer giy rek mindem Gor nimbip dak ak niᅅiy, ar kun ak nep mindenimimb apiyn.”

<sup>18</sup> Pen bi kumbak sek mindey Gor kuyip dip gok, kumbak ma tikningiy. Bi kumbak tikey kuyip dip gok, tip ak poᅅgwir ma giningiy.

<sup>19</sup> Kumbak tikiy akaᅅ, ma tikiy, Gor binuk mindpay ak, minim ma mindip. Pen Gor anᅅip rek niᅅiy gipun ak tap yomb yimb.

<sup>20</sup> Nind yerer giy rek mindem Gor nimbip dak ak, ar kun ak nep mindenimimb.

<sup>21</sup> Nimbip gunap bi gunap tawiy dam woᅅg kuyip ak anᅅ ayey, pey ak ma diy, apay apay rek giy kalambis woᅅg rek gipim. Pen Gor nimbip dip rek, kuyip kiring amjun anᅅiy gos ak

ma niñnimimb. Pen kisen kirgiy yikop mindep rek ayonimuñ, kirgiy yikop mindenimimb. Pen biyomb apay rek kisen gipim ak, nimb nep ma gipim;

<sup>22</sup> Krays chinup dek, biynimb nuk mindpun gok mañgiysek, aᅅgip rek kisen gipun. Pen tap siy tap timey giy kalambis rek mindon Krays chinup dek, miñiy kind nup okok ken mindiy, mindrep gun aᅅgiy gos ak niñnimimb.

<sup>23</sup> Gor Ñinuk ak timey giyñgipim ak niñiy, sanj yomb yimb rek gek, biynimb nuk mindpim. Gos kun ak niñiy, biynimb Gor minim aspun aᅅgiy yesek apay gunap, ap minim ar gunap key aᅅgeniñgiy, kuyip ma kisen ginimimb.

<sup>24</sup> Kun ak mam ay sikop. Yerer giy rek mindem Gor nimbip dak ak; ar kun ak nep mindenimimb.

### *Biyñ Piñ Bi Paranj Gok Kuyip Minim Ak*

<sup>25</sup> Pen biyn dep bi dep minim ak aᅅgñiñg gispiyn. Minim kun biy Biyomb ak aᅅgek niñiy nimbip ma aspiyn. Pen nuk yip simb niñiy diy kond mindip rek, nimbip minim yesek gunap ma aᅅgñiñgayn.

<sup>26</sup> Miñiy kosyam mindep rek ayip ñin biy, mindpim rek nep mindenimimb.

<sup>27-28</sup> Nimb bi biyn sek akañ, biyn bi sek mindpim gok, biyn chin gok kuyip akañ, bi chin gok kuyip kirgiy, yikop mindon aᅅgiy ma aᅅgnimimb. Pen nimb biyn sek ma mindpim gok, bi sek ma mindpim gok, biyn dun bi dun aᅅgiy gos ak ma niñnimimb. Pen diniñgambim ak minim ma mindip. Diy mey, miker keykey diniñgambim gos ak niñiy aspiyn.

<sup>29</sup> Mam ay sikop. Minim aspiyn kun ak, Biyomb chin Krays mañ mindip winiᅅgamb ak, biyn sek bi sek mindpun aᅅiy gos yomb ma ninjun; Gor ker mindpun aᅅiy gos yomb ak ninjun.

<sup>30</sup> Chin biynimb simb gek siy aᅅep rek mindpun gok; gos kun ak ma ninjiy, yikop mindpun rek mindonjun. Biynimb miñmiñ gep rek gakniᅅ mindpun gok; gos kun ak ma ninjiy, yikop mindpun rek mindonjun. Biynimb tap tawpun gok; biynimb tap ma mindip rek mindonjun.

<sup>31</sup> Biynimb tap lum ar biy niᅅiᅅg diyiᅅg mindpun gok; tap kun gok niᅅon tap yomb rek ma aynimuᅅ. Yenen: mankumb biy key kindiknimb ayniᅅgamb ñin ak mañ mindip.

<sup>32</sup> Yip tep gip ak, nimbip miker yomb ma ginimuᅅ. Bi biyn ma dipay gok Gor nup gosimb ninjiy, yergen Bapiy Gor nup tep giniᅅgamb aᅅiy niᅅniᅅgambay.

<sup>33</sup> Bi biyn sek gok, yergen biyn yand ak nup tep giniᅅgamb aᅅiy, tap lum ar biy gos yomb ak ninjiy gey amniᅅgamb.

<sup>34</sup> Kun gek, nuk gos omiᅅal niᅅniᅅgamb. Biyn bi ma dipay gok, Gor nup gosimb ninjiy mindrep giy, nup nep gosimb niᅅun aᅅiy niᅅniᅅgambay; pen biyn bi sek gok yergen, bi yand ak nup tep giniᅅgamb aᅅiy, tap lum ar biy gos ak ninjiy gey amniᅅgamb.

<sup>35</sup> Minim aspiyn kun biy, nimbip mer aᅅiy ma aspiyn; nimbip gos ninjiy, Biyomb ak nup gosimb niᅅiᅅg, mindrep gim aᅅiy aspiyn. Yikop ak gos omiᅅal ninjiy, nup direp ma giniᅅgambim.

<sup>36</sup> Pen bi gunap yikop mindey, kuyip biyn dap

ñey, yand bi woskey mindeningayn angyi, mind dand amiy, biyn kun ak nup niñey mindep rek ma ayek akan, biyn yimgeprek mindek niñiy, diniñgambay ak tep. Minim ma mindip.

<sup>37</sup> Pen bi woskey kun gok rek, nup nembnemb giy mer; Gor nup nep gosimb niñiy angyi, biyn ma diy, kilis yimb giy mindeningambay ak, kunep minim ma mindip. Tep yimb giniñgambay.

<sup>38</sup> Kun ak bi biyn kuyip angyak ak dipay gok tep dipay. Pen biyn ma diy, yikop mindiy mindrep gipay gok, tep yimb gipay.

<sup>39</sup> Biyn gok nunñgumiy sikop mindyakniñ, yip nep mindeningambay. Kumek nep mey; am bi kisen diniñ, diniñgambay. Pen bi Gor ker mindeningiy gok nep diniñgiy.

<sup>40</sup> Pen gos yand niñbiyn ak: yikop mindpay rek mindeningiy ak, tep yimb. Yand nep mer: Gor Kawnan ak, yip gos ñakniñ aspiyn rek ayip.

## 8

### *Tap Pik Chip Day Tap Gok Simboñgipay Ak Ñiñjun Akan Mer Angyak*

<sup>1</sup> Pen biynimb yikop tap yesek angnibay gok, kuyip tap simboñgiy pikey ñiñjun akan ma ñiñjun angyi yip angnibim minim ak, nimbip pen angning gispiyn. Nimb gunap apim, “Chin biynimb gos niñep mindpun. Tap ñiñemb tap gunap simboñgiy pikpay ak ñiñning ñiñningambun apim.” Apim kun ak Gor nup wasemb ay, biynimb gok kuyip wasemb ay ma apim.

<sup>2</sup> Biynimb gos niñep yimb mindpun apay gok, minim niñningiy ak ma niñiy, kun apay.



<sup>3</sup> Pen Gor nuk biynimb nup gosimb nokom niñiy wasemb aypay gok, biynimb yand aņgiy niñimb.

<sup>4</sup> Pen tap kiyk simboņgipay kun gok chin niñbun: tap mer; Gor nep mey, Biyomb yimb.

<sup>5</sup> Biynimb gunap tap chin aņgniñbun mey ak aņgiy, biyomb chinup kond mindonimuñ mey ak aņgiy, tap keykey semb biyoñ man biy aņgniñbay ak pen;

<sup>6</sup> Gor chin ak nokom yimb mindip. Nuk Bapiy chin tap okok maņgiysek gayek mindip. Nuk mindakniñ chin mindpun. Ñinuk Biyomb chin Jiysis Krays kunep nokom nep mindip. Nuk mindakniñ chin mindpun. Tap gunap simboņgipay gok yikop simboņgipay.

<sup>7</sup> Pen biynimb gunap minim kun ak ma niñbay rek, nimb Gor nup chinğrep gipim gok, tap simboņgiy pikpay kun gok monmon ñimbeneğambim, kiyk kunep ñimbiy, chin Gor ker mindpun rek, yenen tap simboņgiy pikpay ak ñimbspun aņgiy, gospar ayiğ ñimbey, Gor niñek tep ma giniğamb.

<sup>8</sup> Pen tap asikpun akan monmon ñimbun ak, minim ma mindip.

<sup>9</sup> Pen nimb biynimb niñrep gipim gok, tap bap ñimbon, mam ay niñrep ma gipay gok niñiy kunep giy, apyap pikniñgiy rek ayip ak niñiy, tap kun ak ma ñiñnimimb.

<sup>10</sup> Yenen: nimb biynimb niñrep gipim gok, am gor yesek aņgniñbay korip miğgan ak amiy, tap

ñimbem, mam ay niñrep ma gipay gok, ap nimbip niñiy kiyk kunep ñiñningiy rek ayip.

<sup>11-12</sup> Kun ak nimb niñrep gipun angyi gem, mam ay Krays diniñg kumak gok gospar ayiñg kunep giy, apyap pikniñgambay. Giniñgambim ar kun ak, kuyip direp ma giy, Krays nup direp ma giy giniñgambim.

<sup>13</sup> Kun ak tap ñiñemb gunap ñimben, mam ay gunap ñimbiy apyap pikniñgiy rek ayek niñiy, tap kun gok ma ñiñnim.

## 9

### *Pol Pey Ma Dak Ak Nup Tep Gak*

<sup>1</sup> Yand bi Jiysis minim dand amemb mindpiyn rek, tap bap yip kinjen ma tikip; nimbip wong giñimbiyn rek, yip tap gunap ñinimimb angniniñg ap-nip. Akan yand bi Jiysis minim dand amemb ma mindpiyn. Nimb niñbim: yand Biyomb chin Jiysis nup windin niñiy, minim tep nup ak angnen, nimb diy mey; biynimb nuk mindpim.

<sup>2</sup> Biynimb gunap yip bi yikop angyi niñningiy rek ayip ak pen, nimbip minim tep angenik niñbik rek, yip niñrep gipim.

<sup>3</sup> Biynimb gunap yip minim yomb angey, kuyip pen apiyn, “Biynimb Gor minim tep ak angen, nup chingipay gok kuyip windin ma niñbim ak mey, yip minim yomb aspim apiyn.”

<sup>4</sup> Nimbip wong giñimbiyn rek, pen tap keñmangyi tap gok dinim rek ma ayip?

<sup>5</sup> Wong nimbip gipiyn rek, yand pen ay Jiysis nup chingip bap diy, dand minim tep angnirangyiñg, tap ñiñjur rek ma ayip? Piyta sek,

bi Jiysis minim dand amemb gunap sek, mam yikop gunap sek per biyn kiyk gok sek dand tanġey, kuyip direp gipay.

<sup>6</sup> Akan Banabas chirmiġay nep kinjeġ bap ma mindek, maniy woġg piiskind ak giyiġg tap ñimbur.

<sup>7</sup> Bi amiy gok woġg gipay rek, tap kiyk key ma piyow niġbay. Kuyip tap ñey ñimbay. Bi tap yimbay gok, yimbay rek piġaġg dapiy ñimbay. Bi kaw mokpay gok, mokpay rek, tiy mik diy ñimbay.

<sup>8</sup> Minim aspiyn kun ak niġem, Gor minim rek ma ayip, biynimb gos timund key niġiy apay rek ayip?

<sup>9</sup> Pen Mosis Gor low minim ak tikiy aġgak:

“Kanj kaw gok poġind apiy, wiyt tawsimb jakey maġiy ak key ay cheġg ak key ay gaġ aġgiy, dap ayem woġg giyakniġ, meġg miġgan kuyip ak ma tiwniġgrimbiknimimb; woġg ġiniġgambay rek gunap ñiġniġgiy aġgak.”

Gor kanj kaw gok gosimb niġiy minim kun ak ma aġgak;

<sup>10</sup> chinup gos niġiy aġgak. Biynimb tiġiy yiwur giy woġg ġi yimbay gok, biynimb paġg dand opay gok, kuyip gunap ñey ñimbyiġg, tep gakiġ woġg ġiniġgiy aġgak.

<sup>11</sup> Nimbip permindep minim tep ak aġgon niġiy dipim rek, chinup pen tap lum ar biy mindip gok ñiġniġgambim ak tep yimb.

<sup>12</sup> Pen biynimb gunap nimbip minim tep ak aġgñey, maniy tap gok ñimbim rek, Apolas chir nimbip per aġgñor niġbim ak, ma ñiġniġgambim?

Pen nimbip aŋgniŋiy maniy tap gok diprup ak pen; dor, biynimb gunap chirup Gor minim tep ak ma aŋŋiraspiyr, maniy nen asimb aŋgraspiyr aŋgiy, Krays minim tep ak ma niŋniŋgambay ak niŋiy, maniy tap nimbip gok ma diy, chir key maniy woŋg giy, tap taw ñimbyiŋg aŋŋirapur.

<sup>13</sup> Pen nimb niŋbim: Gor aŋgek, biynimb nup aŋgniŋep korip miŋgan woŋg gipay gok, tap opriyŋ dap yokpay gunap diy, tap kiyk taw ñimbay. Biynimb Gor woŋg giyiŋg, tap pik simboŋgipay gok kunep, gunap diy ñimbay.

<sup>14</sup> Kun ak rek Biyomb aŋgek, biynimb minim tep nup aŋŋimbay gok kuyip, pen tap ñey ñimbyiŋg mey, mindrep giyiŋg woŋg kun ak giniŋgambay.

<sup>15</sup> Pen nimbip Gor minim tep ak aŋŋirangen dipim rek, maniy tap keŋmaŋgiy nimbip gunap ma dipiyn ak; yip tep yimb gip. Miŋiy minj tiksipiyn biy, tap nimbip gunap diyn aŋgiy ma aspiyn. Mer yimb! Nimb gos yomb kun ak niŋnimimb rek ayek, yip wak tikip. Kun gek yand nind kumbinip ak, tep yimb.

*Biyimb Kuŋaynep Gor Ker Mindeyan Aŋgiy,  
Pol Kalambis Woŋg Rek Gak*

<sup>16-17</sup> Pen minim aŋŋirapiyn ak, nimb gunap niŋiy aŋgniŋgambim, “Gor nup key yimb gisap aŋgniŋgambim.” Pen ak mer. Woŋg nup gipiyn kun ak, nuk ginimin aŋgak rek nep gipiyn; key yimb ma gipiyn. Pen pey ma diy, nimbip woŋg yikop gi ñimbiyn ak, nuk yip niŋek tep giniŋgamb aŋgiy, miŋmiŋ yimb gipiyn.

18 Pen maniy tap gok ma dipiyn ak, pey yand rek mey, Jiysis minim tep ak, biynimb okok kuyip yikop yimb aᅅᅅimbiyn.

19 Yand bi taw dap ayey, kalambis woᅅg rek giᅅemb bap ma mindpiyn ak pen; biynimb kuᅅaynep Gor ker mindeyaᅅ aᅅgiy, biynimb miᅅmon keykey kuyip kalambis woᅅg rek gipiyn.

20 Jiwda biynimb mindpay namb ak amiy, Krays minim tep ak aᅅᅅen niᅅyaᅅ aᅅgiy, kiy yip mindyᅅg, tap kiyk asikpay gok asikpiyn. Kun ak Jiwda low minim kisen gipay namb ak, yand yip wilikiy mindon yip niᅅey, bi kiyk bap rek ayip.

21 Pen biynimb Jiwda low minim ma niᅅbay namb ak amiy, Krays minim tep ak niᅅyaᅅ aᅅgiy, kiyk yip yᅅgᅅg giy minden niᅅey, bi kiyk bap rek ayip. Pen kun giy, monmon giyᅅg Gor nup minim ak ma kirpiyn; Krays aᅅgip aᅅgip rek nep gipiyn.

22 Biynimb Gor ker mindiy, aᅅgip ar ak niᅅrep ma gipay namb ak amiy, Krays minim ak aᅅᅅen niᅅrep giyaᅅ aᅅgiy, kiy yip yᅅgᅅg giy minden niᅅey, bi kiyk bap rek ayip. Kun ak biynimb miᅅmon keykey mindpay gok, kurginiᅅgiy rek ayek niᅅiy, gunap Krays nup dey kuyip tuᅅgasik dinimuᅅ aᅅgiy, kiy yip wilikiy aᅅgrip gipiyn.

23 Gipiyn kun ak, minim tep aᅅgip ar ak gen amek, mindrep giyn aᅅgiy gipiyn.

### *Kilis Yimb Giy Gon Amek Mindrep Yimb Giniᅅgambun*

24 Nimb niᅅbim: biynimb resis gipay gok, kuᅅaynep resis gipay ak pen, bi nind amjakpay

gok wiyn giy tap dipay. Kun ak rek, nimb kunep kilis giy, resis rek ginimimb.

<sup>25</sup> Biynimb resis giy wiyn gun apay gok, monmon ma gipay; asikrep giy, tap kuyip kilis ñiningamb ak nep ñimbiy, resis giy wiyn gipay. Tap sikoy per ma mindeningamb gok diniñg kun gipay; chin resis gipun ak, junj ak mindakniñg gipun.

<sup>26</sup> Kun ak mey, yand resis gipiyn ak, kilisrimey giy gipiyn. Key okok ma niñbiyn; amniñg gipiyn miñgan ak nep niñiy, kasek ambiyn. Pen bi kochiñ pikpay gok, monmon ma pikpay, niñrep giy pikpay rek ak gipiyn.

<sup>27</sup> Biynimb gunap kuyip añañen niñbay ak pen; yand key apyap piknim rek ayip ak, niñrep giy nokom gen amjap.

## 10

### *Basind Apis Sikop Kuyip Gak Ak Sakiy Ma Ginjun*

<sup>1</sup> Yenen: mam ay sikop. Chin Jiwdá, basind apis chin wosrey gok, miñmon nep namb okok tañgiñg kumyak kesim ak niñbim. Kiyk miñmon Yijip mindiy, Gor semb band tikiy kuyip yiw giy kond mindiyñg, yip am am ñiñg solwara Likañ apay ak gek, liñg pis pis amek, kind bindon amniyak.

<sup>2</sup> Gak kun ak mañgiyseñ niñiy añañak, “Mosis biyomb chin Gor minim añañip ak, añañingamb rek giniñgambun añañak.” Miñiy ñiñg pikñimbay rek, semb band ak sek, ñiñg Likañ kun ak sek

kuyip gak kun ak, Mosis minim ak diningambun angyak.

<sup>3</sup> Biynimb kun gok mangiysek miñmon nep namb okok amniyakniñ, Gor Kawnan ak, tap keñmangyi ñakniñ, ñimbying amniyak.

<sup>4</sup> Pen ñing ñinemb ak ma yimb mindek, Gor Kawnan ak gek kamb namb ak wikiy apek, mangiysek ñinyak. Ñing kun ak kamb kiyk yip ameyak namb ak wikiy apek ñinyak. Kamb kun ak mey, Krays nep.

<sup>5</sup> Kun ak mangiysek nup chingningiy ak pen, kuñay yimb nep nuk angak rek ma niñey, nup yiruk gek, kuyip dand miñmon amning gak ak ma dand amek, miñmon nep namb kun okok kinrangiy, tokiy ay kumyak.

<sup>6</sup> Pen kuyip yerer gak kesim tikyak ak, Gor chinup gos tep niñningiy angyi gek, Baybol buk ak tikyak. Kun ak kiyk tap Gor mer angak gok dun dun angyi giyak rek ma ginjun.

<sup>7</sup> Kiyk tap yesek gok simbongying, angninying giyak rek ma ginjun. Kiyk giyak ar ak tikiy angyak, “Bisgiy tap ñimbying, ñing ñimbying, tikjak kongim pangyong gey amnak angyak.”

<sup>8</sup> Pen gunap kunep biyn siy bi siy giy, ñin nokom tiwendiy chiriy tawsin (23,000) kumyak rek, chin kun ma giy, asikrep ginjun.

<sup>9</sup> Gunap Biyomb chin anup alemb alemb ñey; nuk gek ñom kondkol gok, kuyip siwey kumyak ak kunep, niñrep ginjun.

<sup>10</sup> Gunap Gor nup anjjiwey, enjol biynimb pikayep gok ap, kuyip pikayey kumyak.

11 Gor kuyip gak kun ak, biynimb gos niñyan angyiy gak. Pen chin biynimb Krays tip asaw angyiy kond mindpun ñin biy niñyan angyiy, Mosis kesim kun ak tikayek, Baybol buk biyan riyt giy niñbun.

12 Pen biynimb key niñrep gipun angningambay gok, apyap pikningiy rek ayip ak, niñrep ginjun.

13 Tap siy tap timey ginjun angyiy gos ar keykey wip ak chinup nep ma gip; biynimb okok kuyip kunep gip. Gor chinup angak rek kond nep mindeningamb ak mey, nuk gek, gos niñningambun kun ak tapin apiy, chinup aybiriknimuñ rek ma ayningamb. Nup chingiy nep mindiy mey, nuk gek tap timey kun gok asikrep ginjun rek ayningamb.

*Biret Kind Nokom Tipang Ñimb Ak, Kiñiñ Nokom Mindpun*

14 Kun ak biynimb tep yand gok. Tap yesek, tap yikop gok ma simboñnimimb.

15 Nimb biynimb gos timund sek mindpim ak mey, minim angning gispiyn ak, niñind akan angyiy, nimb key niñnimimb.

16 Ñiñg wayn ak diy, Gor nup tep angyiy ñimbun ak, likañ nuk yowak rek, Krays yip jimñiy mindpun angyiy ñimbun. Pen Gor nup tep angyiy, biret tipang ñimbun ak; mumbwak nup timey giyak rek, chinup direp gip angyiy ñimbun.

17 Chin biynimb kuñaynep biret kind nokom tipang ñimbun ak, biynimb nuk kiñiñ nokom mindpun angyiy gipun.

18 Pen Jiwda kay gipay ak niñbim. Meymey siypsiyp tap gok dand apiy, Gor nup simboñning



pikpay ñin ak, biynimb apiy yip ñimbay gok, gos ar nokom mindek mey, jimñiy ñimbay.

<sup>19</sup> Pen tap ñin mañgiy silok gay simboñgiyap gok, tap niñind yimb añgiy nimbip ma aspiyn.

<sup>20</sup> Biynimb ma niñbay gok, tap yesek kun gok añgniñsipun añgiy, kichekiy malñiluk tap gok nep añgniñiy; Gor nup ma añgniñbay. Kun ak mey, nimb kiyk yip jimñiy ar nokom kun anep min-denĩngambim ak; tep ma yimb giniñgamb añgiy aspiyn.

<sup>21</sup> Biyomb chin anup añgniñiy, ñiñg wayn sek, biret sek ñimb molik biyañ ay; Seytan nup simboñgiy ñiñg tap ñiñemb nuk ak, ñimb ar biyoñ ma ayjun.

<sup>22</sup> Pen kun giniñgambun ak, Biyomb chin ak, chinup miluk niñañ añgiy giniñgambun. Chin biynimb yomb yimb; Gor bi yikop añgiy, kun ak rek ginjun?

<sup>23</sup> Biynimb gunap apay, “Tap ñiñemb tap gunap simboñgiy pik dap maker aypay gok ñiñning, tawiy ñiniñgambun. Low bap kun ak rek ma mindip ak, monmon tawiy ñiñningambun apay.” Ak kun apay ak pen, ar kun ak nep niñiy giniñgambun ak, tep ma giniñgamb. Monmon giniñgambun kun ak, biynimb gunap niñiy kunep giy, yenen Gor nup kun gipun añgiy, gos kuñaynep niñningambay.

<sup>24</sup> Chin mindrep giniñgambun ar ak nep niñiy ma ginjun; biynimb gunap kuyip gosimb niñiy, kiy mindrep giniñgiy ar ak niñiy ginjun.

*Gor Nup Yimb Ak Perper Nep Dand Aranjun*

25 Pen tap pik maker aypay gok, chipday tap gok simbonjiy dap maker aypay akan anjiy gos yomb ak niñiy, minim kun ak ma anjniñnimimb; monmon tawiy ñiñnimimb.

26 Yenen: Baybol buk ak tikiy angyak, “Miñmon tap okok mañgiysek, Gor chinup niñiy gayak angyak.”

27 Pen biynimb Gor ker ma mindpay gunap nimbip, “Apem tap ñiñun anjeniñgiy;” nimb korip kuyip amniñg, gos kuñay ma niñnimimb. Monmon amiy, tap dap ñiniñgiy gok monmon ñiñnimimb.

28-29 Pen am mindiy nimbip, “Tap ñiñniñg gispun biy, tap yesek gok simbonjiy pik dap aypun anjeniñgiy,” ma ñiñnimimb. Nimb ñiñniñg ñimbikip ak pen; kiyk gos kuñay niñniñgiy rek ayek, kuyip nen anjiy, kirginiñgambim. Pen nimb gunap anjniñgambim, “Chinup yenen gos kuñay niñniñgambay.

30 Tap ñiñemb kun gok, Gor nup tep anjiy niñniñgambun ak; yenen chinup gos kuñay niñniñgambay anjniñgambim.”

31 Kun anjniñgambim ak pen, tap ñiñniñg akan, yerer giniñg, Gor nup yimb dand aranemb ar ak nep ginjun.

32 Jiwda biynimb akan, Griyk biynimb akan, Gor biynimb nuk gok niñey; tep ma giniñgamb ar ak niñiy, ma ginjun.

33 Yand gipiyn ak; yip key tep ginimuñ ar ak ma gipiyn; biynimb gok Gor nup gosimb niñey, kuyip diñimuñ anjiy ar ak nep gipiyn.

# 11

<sup>1</sup> Kun ak nen, yand Krays gip ar ak ninjy gipiyn rek, nimb yand gipiyn ar ak ninjy ginimimb.

## *Biyn Gok Lotiw Namb Ak Jun Pikyiwginiñgiy*

<sup>2</sup> Nimbip Gor minim aᅅᅅnen ninjdiy, niñyiñg nep mindpim ak; tep yimb aspiyn.

<sup>3</sup> Pen miñiy aᅅᅅniñg gispiyn ak niñnimimb. Biyomb chin Krays Nop aᅅᅅip rek ninjy gip; bi gok Krays aᅅᅅip rek ninjy gipay; biyn gok nuᅅᅅumiy kiyk apay rek ninjy gipay.

<sup>4</sup> Pen bi gok biyn kay gipay rek, jun ak pikyiwgiy, biynimb gok kuyip minim aᅅᅅneniñgambay akan, Gor nup aᅅᅅniñeniñgambay ak; Biyomb chin ak, bi yikop par bap rek ayek kun giniñgambay.

<sup>5</sup> Pen biyn gok bi kay gipay rek, jun ak misen mindakniñ, minim aᅅᅅneniñgambay akan, Gor nup aᅅᅅniñeniñgambay; nuᅅᅅumiy sikop kuyip tap yikop par bap rek ayek, kun giniñgambay.

<sup>6</sup> Pen biyn gunap jun kas ma yiwginjun aᅅᅅiy, jun kas kiyk ak tik maᅅ giy akan, pisnep tikyokniñgiy. Pen ar kun ak nambin gonimuᅅ, jun ak tomb yiwgiy nep minim aᅅᅅniñgiy.

<sup>7</sup> Gor bi gok kuyip nundkaw rek gayek mindpay ak, jun kiyk ak ma pikyiwginiñgiy. Pen biyn gok, bi gok rek gayek mindpay ak, jun kiyk ak pikyiwgiy nep, minim aᅅᅅniñgiy.

<sup>8</sup> Gor biyn tiñglim kind ak diy, bi ma gayak; bi tiñglim kind ak diy, biyn gayak.

<sup>9</sup> Pen biyn kondep bap ma mindip aᅅᅅiy, nuᅅᅅumiy nup ma gak; bi kondep nup bap ma mindip aᅅᅅiy, biynuk nup gayak.

<sup>10</sup> Ar kun ak enjol niñmindpay rek, biyn gok jun pikyiwgiy mindiy, nuñgumiy angnimuñ rek giniñgiy.

<sup>11</sup> Pen biyn gok kuyip ma anğ sikoy ginimimb. Biyomb chin ak bi gok kuyip diy, biyn gok kuyip ma kirgip; biyn diy bi diy gip. Kun ak biynimb nup ker mindpim gok; biyn asik key ay, bi asik key ay geniñgambim, tep ma giniñgamb.

<sup>12</sup> Gor nind bi tiñglim kind ak diy, biyn ak gayak. Miñiy biyn gok mindiy mey, ñapan tikyakniñ, bi gok mindpun. Pen Gor nuk junj ak mey, biynimb tap okok mañgiyseker nuk kond mindip.

<sup>13</sup> Pen biyn gok jun ak misen mindakniñ, Gor nup anğniñniñgambay ak, tep giniñgamb akan, nimb key niñnimimb.

<sup>14</sup> Yand niñbiyn, chin bi gok jun kas paryomb mindeniñgamb ak, tep ma giniñgamb.

<sup>15</sup> Biyn gok nep jun kas paryomb jakip rek, jun kiyk ak pikyiwgiy mindeniñgiy anğiy gak.

<sup>16</sup> Pen biynimb gunap minim aspiyn kun ak niñiy minim mindonimuñ, anğniñ anğniñgiy. Yand pen gipiyn gipiyn rek ak aspiyn. Biynimb Gor ker mindpay miñmon okok kunep, ap nan-giy, aspiyn kun ak rek nep gipay.

### *Biret Sek Ñiñg Wayn Sek Ñiñniñg Girep Ma Giyak*

<sup>17</sup> Minim bap anğniñg gispiyn. Per ap nan-giy, miñ tep ar ak ma gipim. Kun ak nimbip minim tep angnim rek ma ayip.

<sup>18</sup> Biynimb gunap apay, “Ap nan-giy minim apim ñin ak, asik keykey aypim anğey,” minim kun ak gunap gem, niñind apay anğiy niñbiyn.

19 Pen gos ar keykey niñiy gem amjap kun ak, biynimb gok mindrep gipay; biynimb gok mindrep ma gipay aņgiy, misen yimb niñningambun.

20 Pen ap nan-giy tap ñimbim kun ak, Biyomb bired wayn tap gok jimñiy ñiñnimimb aņgak rek ma ñimbim; yesek ar ak gipim.

21 Mam ay gunap yiwan nep mindyakniñ, kuyip gos niñiy mer; nimb gunap tap yomb ñimbim, ñiñg wayn kuņay ñimbim sakiy aypim.

22 Pen korip nimb ma mindek lotiw mindep tip ak amiy; tap ñimbyiñg, ñiñg ñimbyiñg gipim? Akañ, Gor nup niñem, tap yikop bap rek ayek kun gipim? Mam ay yiwan nen mindpay gok kuyip, nambiñ yomb ñimbim kun ak, nimbip yerip aņgnim? Mindrep gipay aņgnim? Mer! Nimbip kun ma aņgningayn.

### *Jiysis Binuk Gok Kuyip Bired Wayn Ñak*

23 Yand nimbip bired wayn ñiñningambim rek minim aņgnik ñin ak, gos yand key niñiy ma aņgnik; Biyomb chin ak yip gos ñak ar ak nep aņgnik. Pen Jiysis nup mimuñg niñyak ñin ak, kisyim apek, tap ñiñning giy, nuk bired ak diy,

24 Gor nup tep aņgiy, tipañg binuk gok kuyip ñiyiñg aņgak, “Tip nimbip ak diy kumnim apiyn rek, mumbwak yip di monmon giniñgambay. Kun ak rek bired tipañg aysipiyn biy diy ñimbyiñg, yip gosimb niñnimimb aņgak.”

25 Pen tap ñimbdeyak, ñiñg wayn ak kunep di kap miñgan ak songiy, kuyip ñiyiñg aņgak, “Gor kisen giniñgayn aņgiy minim aņgayak ar ak; likañ yip yowniñgamb rek, nuk yip jimñiy

mindeningambim ak mey; ñiņg wayn kun biy, yip gosimb niņyিং ñiņnimimb angak.”

<sup>26</sup> Kun ak Jiysis ma andkind wip ñin biy, biret wayn ñimbying nep mindem mey; biynimb gok Jiysis chinup kim diniņg kumak ak niņningiy.

*Asik Tep Giy Biret Wayn Ñiņnimimb*

<sup>27</sup> Pen biynimb gunap gosimb niņiy mer, biret wayn monmon diniņgambay ak; Biyomb chinup angyi kumimb mumbwak likañ nup ak, tap yikop rek ayek, kun giniņgambay. Gor niņek tap siy tap timey giniņgambay.

<sup>28</sup> Kun ak yergiy rek mindpim ak key niņiy, Gor yip jimñiy mindyিং nep biret wayn ak ñiņnimimb.

<sup>29</sup> Biynimb Jiysis chinup angyi kumimb gosimb ak niņiy mer; biret wayn monmon ñiņningambay gok; kiyk key yiwur diniņg kun giniņgambay.

<sup>30</sup> Ar kun anep, biynimb nimbip gunap mawses giy, tap giy gip; gunap pisnep kumbay.

<sup>31</sup> Gos niņrep giy ñiņningambun ak, minim yomb ma diniņgambun.

<sup>32</sup> Pen biynimb nuk mindpun rek, mindrep ma gon, chinup timund winjikniņgamb. Timund winjikek mey, gos niņiy, biynimb man ar biy monmon gipay gok yip, mon key yinjav ak ma amniņgambun.

<sup>33</sup> Pen mam ay sikop! Tap ñiņning ap nan-giy, biynimb gunap tawsak ay ma ñiņnimimb; kuyip kond mindiy, jimñiy ñiņnimimb.

<sup>34</sup> Pen yiwan gek, korip nimbik okok tap ñimbiy winimimb. Mer ak monmon giy, minim yomb diniņgambim.

Minim day gunap, kisen mindpim ak amiy, anğñirep giningayn.

## 12

### *Gor Kawnan Ak Kilis Ñakniñ Biynimb Nuk Gunap Kuyip Direp Gipun*

<sup>1</sup> Pen mam ay sikop. Miñiy Gor Kawnan ak kilis keykey ñek, woŋ ar keykey gipun minim ak, nimbip anğrep giniŋ gispiyn.

<sup>2</sup> Nimb niŋbim: nind Krays nup ma dipik ñin ak, tap gos ma mindip gok nimbip gos lip gek, tap yesek kun gok anğniñ mindyiniğipim.

<sup>3</sup> Kun ak nimbip anğrep gen, niŋrep ginimimb. Gor Kawnan ak gos ñakniñ, Biyomb chin ak nup ma anğjiwniŋgambay. Pen nuk gos ñek nep, Jiysis Biyomb chin anğiy, biynimb gok kuyip anğñimbay.

<sup>4</sup> Gor Kawnan ak gos tep ñakniñ, woŋ ar keykey gipun ak pen, Kawnan nuk keykey ma mindip; nokom yimb mindip.

<sup>5</sup> Woŋ ar keykey giyiŋ, Biyomb chin ak nup direp gipun ak pen, nuk kunep nokom yimb.

<sup>6</sup> Gor chin nokom yimb mindip rek, chinup kilis keykey ñakniñ, woŋ ar keykey giyiŋ nup direp gipun.

<sup>7</sup> Gor Kawnan chinup kilis keykey ñek, woŋ ar keykey gipun kun ak, biynimb nuk gok maŋgiysek direp gon, mindrep giyaŋ anğiy gip.

<sup>8</sup> Gor Kawnan ak chinup biynimb nuk gunap gos tep ñek, minim nup ak niŋiy apun. Pen Kawnan nokom kun ak chinup biynimb gunap

gos ñek, Gor minim tep nuk kiñiñ ak niñiy aňgñimbun.

<sup>9</sup> Kawnan nuk nokom kun ak chinup gunap gos ñek, Gor nup gosimb niñiyiñ key yimb gipun: gunap biynimb tap gip gok gon jakambay;

<sup>10</sup> gunap tap mageprek gok gipun; gunap Gor minim nup gunap niñiy aňgñimbun; gunap Gor Kawnan akan, tap yerip rek biynimb bak ayek gipay ak niñbun; gunap minim yimb keykey apun; gunap minim yimb keykey aňgey niñiy, tuňgandikiy biynimb gok kuyip aňgñimbun.

<sup>11</sup> Pen Gor Kawnan nokom yimb mindip ak, gos key niñimb rek, chin biynimb nuk mindpun gok, kilis keykey ñakniñ, woňg ar keykey gipun.

### *Woňg Ar Keykey Giy Krays Nup Direp Gipun*

<sup>12</sup> Mumbwak chin nokom yimb mindip ak pen, day nuk kuñaynep mindip. Kun ak rek, chin Krays biynimb nuk gok mindpun. Chin kuñaynep woňg ar keykey gipun ak pen, biynimb kiñiñ nokom yimb mindpun.

<sup>13</sup> Chin Jiwda biynimb gok, Jiwda mer gok; biynimb yimb mindip gok, yimb ma mindip gok Gor Kawnan nokom kun anep, chinup maňgiysek ñiñ rek pikñek, Krays mumbwak nuk nokom rek mindpun.

<sup>14</sup> Mumbwak ak nokom ak pen, day nuk kuñay mindip.

<sup>15</sup> Tomb kind ak, ñin kind ak niñek nuk yomb rek ayek, yand sikoy aňgningamb ak; yikop aňgningamb. Kiyk mumbwak nokom mindiy, woňg jimñiy gipiy.



16 Timund ak, windin ak niñiy, nuk yomb yand sikoy anğningamb ak yikop anğningamb. Kiyk mumbwak nokom ayek, woñg jimñiy gipiy.

17 Pen chinup gayak ñin ak, windin okok mañgiysek gaypikop ak; yergiy minim anğey timund pik niñbinup? Pen timund mañgiysek nep gayambikop; yergiy kuy puñg niñbinup.

18-19 Kun ak rek, chin Krays biynimb nuk mindpun gok mañgiysek ar nokom ma gipun. Gor Kawnan ak key niñek tep gip rek, kilis keykey ñakniñ, ar keykey gipun.

20 Kun ak mey, mumbwak nokom ak pen; day nuk kuñaynep mindip.

21 Pen windin ak, ñin kind ak yenen yand yip mindip; woñg nuk bap ma mindip anğiy, asik am keynep mindiy, mindrep ma giniñgamb. Jun won ak, tomb kind ak yenen yand yip mindip; woñg nuk bap ma mindip anğiy, asik am keynep mindiy, mindrep ma giniñgamb.

22 Mumbwak day gunap, day gunap kuyip woñg nimb bap ma mindip anğiy, asik keykey ay, mindeniñgiy rek ma ayningamb.

23 Mumbwak chin day yikop gok, chech mokyañ tap gok ay gipun rek, yimb dand aranbun. Day biynimb niñey, tep ma giniñgamb anğiy pikyiwgipun gok, per direp gipun kun ak rek, yimb dand aranbun.

24 Kun ak rek nep, chin Krays biynimb kiñiñ nuk mindpun. Biynimb yimb ma mindip gok, Gor gek yimb mindip.

25 Asik keykey ma ayningiy anğiy, nuk gek biynimb yimb ma mindip gok yimb dey, biynimb

nuk gunap yip, andip andip rek mindiy mey, penpen simb niñbay.

<sup>26</sup> Pen day bap miker gek niñey, mañgiysek simb gip; pen day bap mindrep gek niñey, mañgiysek tep gip.

<sup>27</sup> Chin Krays kiñiñ nuk mindpun gok, ñin kind tomb kind nuk ak mindiy, aᅅgip rek gipun.

<sup>28</sup> Biynimb kiñiñ nuk mindpun namb ak, nuk chinup aᅅgayip rek: nind bi Jiysis minim dand amemb gok mindpun; namb ak bi Gor minim aᅅgep gok mindpun; namb kaney ak minim nup aᅅᅅemb tiysa gok mindpun; gunap tap mageprek gok gipun, gunap biynimb tap gip gok kuyip gon jakambay; gunap biynimb simb niñiy direp gep gok mindpun; gunap biynimb gok kuyip kond mindnukniñ, mindrep gipay; gunap minim yimb keykey gok apun.

<sup>29</sup> Pen chin mañgiysek bi Jiysis minim dand amemb ma mindpun. Mañgiysek bi Gor minim aᅅgep ak ma mindpun. Mañgiysek tiysa ma mindpun. Mañgiysek tap mageprek gok ma gipun.

<sup>30</sup> Mañgiysek biynimb tap gip gok gon ma jakambay. Mañgiysek minim yimb key gunap ma apun. Mañgiysek minim yimb keykey apay rek niñiy, tuᅅᅅandikiy biynimb gok kuyip ma aᅅᅅiimbun. Yenen: Gor Kawnan ak chinup kilis ar keykey ñimb rek, nup woᅅᅅ ar keykey gipun.

<sup>31</sup> Kun ak Gor Kawnan chinup kond mindakniñ, Gor nup woᅅᅅ tep yimb bap ginjun aᅅgiy, ginimimb.

Pen miñiy nimbip tep yimb giniᅅgamb ar ak aᅅᅅniᅅᅅ gispiyn.

# 13

## *Penpen Wasemb Ayep*

<sup>1</sup> Chin biynimb gunap kuyip wasemb ma ay, yikop kuyip minim yimb keykey angningambun akan, enjol minim apay rek angningambun ak, tep ma giningambun. Kun gon bel ak pikey pikey, biynimb gok timund pikniñiy, kirpay rek nep ayningamb. Pen biynimb wasemb ayningambun ak tap yomb yimb.

<sup>2</sup> Chin Gor biynimb nuk mindpun gok; gunap Gor minim anjep gok mindeningambun, gunap gos tipangiy key yimb niñningambun; gunap Gor nup gosimb niñiy, yirik won gunap anjon key okok amningamb. Pen ak minim yomb mer; ak yikop kun giningambun. Tap yomb yimb mey; biynimb gok kuyip wasemb ayningambun ak.

<sup>3</sup> Pen tap chin manjiysek mindip rek, bilok biynimb tap ma mindip gok kuyip ñiningambun akan; Gor wonj ak ginukniñ, biynimb gunap chinup miluk niñiy, mon yinimb namb ak diyokekey kumningambun ak; Gor nup tep giningamb angningambun ak pen, wasemb ma ayningambun rek, giningambun kun ak tep ma giningamb.

<sup>4-5</sup> Pen biynimb Gor nup wasemb ay, biynimb gunap kuyip wasemb ay gipay gok, mind tep yimb gipay. Biynimb gok kuyip simb niñiy mey, kuyip timey gey, kal ma jiwpay; biynimb gunap tap tep dey, kuyip miluk ma niñbay; chin key biynimb yomb mindpun anjiy monmon ma gipay; kapkap mindrep yimb gipay. Tap tep gunap niñiy mapin ma aypay; biynimb niñiy miluk sek

ma mindpay; kuyip timey gey, gos kun ak niñyng ma mindpay.

<sup>6</sup> Miñ timey ar ak kuyip tep ma gip; Gor miñ ar ak kuyip tep gip.

<sup>7</sup> Pen miker yerip yerip gunap kuyip apek, Gor nup ma kirpay; nup chingiy mindpun ak, mindrep yimb giningambun angyi, tep gakniñ nep mindpay.

<sup>8</sup> Pen kisen Gor Kawnan chinup gos ñek minim nup angnimbun ak; ma angniningambun. Chinup gos ñek minim yimb keykey apun gok, ma angningambun. Day niñbun miñ ak kunep, pungrikningamb ak pen; wasemb aypun miñ ak, per yimb nep mindeningamb.

<sup>9-10</sup> Yenen: chin miñiy ar ar nep niñiy angnimbun; kisen ar ar niñbun rek kirgiy, niñrep yimb giy mindeningambun.

<sup>11</sup> Miñiy ñapan ñaᅇ gos niñiy apay rek angon wip; pen kisen biynimb yomb niñiy apay rek angying; ñapan ñaᅇ gos niñiy apay rek ak kirginingambun.

<sup>12</sup> Miñiy ñing kawnan paᅇgnibay rek ak niñbun: kisen ñin kun ak, Krays chinup niñrep gip rek ak, nup niñrep giningambun.

<sup>13</sup> Kun ak minim yomb omiᅇal nokom mindip: Gor nup gosimb niñep ak; nup gos sek kond mindep ak; wasemb ayep ak. Pen minim yomb yimb ak mey, wasemb ayep ak.

## 14

*Gor Kawnan Nimbip Bak Ay Mindakniñ, Minim Keykey Apim*

<sup>1</sup> Gor chinup kond mindakniņ, biynimb gok kuyip wasemb ay, direp ginjun aņņnimimb. Kun ak Gor nup wonņ nuk ar gunap ginjun aņgyiņņ, biynimb gok kuyip minim nup aņņņemb rek ayniņgamb ak, tep yimb kun giniņgambim.

<sup>2</sup> Pen alemb andik mandik giy, Gor minim aņņniņgambim ak, minim yerip aspay aņgyi, ma niņniņgambay; Gor nep niņniņgamb.

<sup>3</sup> Gor minim misen aņgem mey, biynimb niņiy mindmaņgiy limgek, Gor nup direp yimb giniņgambay.

<sup>4</sup> Kun ak, biynimb Gor Kawnan gek, alemb andik mandik giy Gor minim apay gok, keynep aņgyiņņ niņyiņņ giy, Gor nup direp giniņgiy rek ayip ak pen; biynimb Gor minim misen aņņniņgambay gok, minim aņņrep gey, Gor biynimb nuk kuņaynep niņiy, nup niņrep giniņgambay.

<sup>5</sup> Nimb maņgiysek alemb andik mandik giy Gor minim aņņniņgambim ak, yip tep giniņgamb ak pen; tep yimb giniņgamb ak, minim nup misen aņņniņgambim. Misen aņņniņgambim, biynimb niņiy, Gor nup direp giniņgambay. Pen alemb andik mandik giy aņņniņgambim, biynimb gunap minim kun ak niņiy, junj aņgi ak kun kun giy mindip aņgyi, biynimb gok aņņniņgambay nep, Gor nup gosimb ak niņrep giniņgambay.

<sup>6</sup> Pen yand mindpim ak amiy, minim yimb key bap aņgyiņņ, Gor minim aņņniņgayn; nimb yergiy niņiy, Gor nup chiņņrep yimb giniņgambim. Pen Gor yip gos ñek aņņgen akan,

gos timund yip wip rek gunap anjen akan, Gor minim tep nuk gok angnen nijem mey, Gor nup chingrep yimb ginimimb rek ayningamb.

<sup>7</sup> Giyta, gawimb tap okok pikey, biynimb gunap yergiy, minim asap mey ak angyi niñningambay? Tap gos niñep rek, kun kun aspun angyey niñningiy.

<sup>8</sup> Pen biy kul ak kunep pungey angyep ma gek, an tikjakiy penpen gining gispun angyi, kond mindeningamb?

<sup>9</sup> Kun ak rek mey, nimb biynimb gok kuyip, minim yimb key bap angyi Gor minim ak angneningambim; yergiy minim aspay ak angyi, niñningambay. Nimbik keynep angy angy kir-giningambim.

<sup>10</sup> Pen man ar biy minim yimb keykey mindip rek, minim kiñiñ ak mindakniñ apay; yikop ma apay.

<sup>11</sup> Biynimb gunap minim angyey ma niñningambun ak, chinup niñey, biynimb paryomb okok nimb rek ayningamb. Chin pen kuyip niñon, kunep giningamb.

### *Minim Yimb Keykey Anyniñg, Gos Niñrep Giy Anynimimb*

<sup>12</sup> Nimbip kun ak rek nep giningamb ak, niñrep ginimimb. Gor Kawnan chinup gos ñakniñ, wong nup ak gun angyi kilis gipim ak; niñrep giy, biynimb nuk gok kuyip, direp giningambim ar gok nep ginimimb.

<sup>13</sup> Pen alemb tungandikek minim yimb keykey anyniñg, Gor nup anyniñem, nimbip gos ñakniñ, kun kun aspun angyiñg angninimimb.

14 Mer ak, minim yimb keykey angying, Gor nup angninngayn ak pen, minim kiñin aspiyn ak angyi ma niñningayn; biynimb gok kunep ma niñningambay. Namb yand biyan key kun angnan angek nep angninngayn.

15 Kun ak yand minim yimb keykey angyi, Gor nup angninngan akan, kamep angning; gos niñying, biynimb niñningiy rek ar ak nep angninngayn.

16 Nimbip Gor Kawnan ak gek, minim yimb keykey angying, Gor nup tep angem, tep giningamb ak pen; biynimb gok kiyk ma niñiy, yergiy nimb yip yingong giy, Gor nup tep angying mindeningambim?

17 Gor nup tep angying mindeningambim ak pen; kiyk minim kun ak niñiy rek, Gor nup gosimb niñningiy. Minim ak kiyk key aspay angyi niñningambay.

18 Pen Gor Kawnan gek, minim yimb keykey apun ak, nimbip nep ma gip; yip kunep gek, minim yimb keykey kunaynep per apiyn ak, nup tep apiyn.

19 Pen biynimb ap lotiw mindyakniñ, minim yimb key okok nimb bap angnon ma niñningambay ak; minim niñbay ak nep misen angnon, yip tep giningamb.

20 Pen mam ay sikop. Ñapan ñan niñbay rek nep ma niñnimimb: biynimb yomb gosimb niñbay rek niñnimimb. Tap siy tap timey gep ar ak nep, ñapan ñan rek mindenjun.

21 Jerusalem biynimb wosrey, Gor nup kir-giyak rek, bi Gor minim angep Asaya Baybol buk

ak tikiy angak, “Gor anqip, ‘Yand biynimb guniy timund winjikning, biynimb par okok nimb angen apiy, minim yimb kiyk angyakniq, biynimb guniy ma nep niqningambay anqip’ anqiy” tikayak.

<sup>22</sup> Kun ak niqbun: Gor Kawnan ak gek, minim yimb keykey apay ak, biynimb nup gosimb ma niqbay gok niqningiy anqiy gip. Pen gek minim tep misen anqñimbay ak, biynimb nup gosimb niqbay gok, nup direp yimb giniqiy anqiy gip.

<sup>23</sup> Pen nimb Gor biynimb nuk mindpim gok, ap nan-giy, alemb tuqandikek minim yimb keykey anqiy Gor minim anqningambim; biynimb Gor ker ma mindpay gok nimbip niqiy, biynimb gok sakiy ayek aspay anqningambay.

<sup>24-25</sup> Pen Gor minim misen anqñiyiq mindem, biynimb kun gok rek gunap ap niqiy, tap siy tap timey kapkap gipay gok, gos yomb yimb niqiy, Gor nup niqey jel gek, kongim yimiy, yimb nup dand aranyiq anqningambay, “Niñind! Gor yip mindpim anqningambay.”

### *Lotiw Ak, Yipund Giy Nep Ginimimb*

<sup>26</sup> Kun ak mam ay sikop. Yand aspiyn: ap nan-giniqambim ñin ak, bap kamep anqningamb; bap minim anqñiniqamb, bap Gor gos ñimb rek minim ak anqñiniqamb, bap minim yimb keykey anqiy anqningamb; bap minim anqningamb kun ak, tuqandikiy kun kun giy anqip anqningamb. Kun ak mey, biynimb niqiy mindrep giniqiy ar gok nep ginimimb.

<sup>27</sup> Pen alemb tuqandikiy minim yimb keykey anqning, biynimb omiqal akan, omiqal nokom



nep angninġiy. Kuṇaynep ma angninġiy. Pen biynimb nokom bap tikjakiy minim anġek, bap pen, kun kun giy anġip anġnimuṇ.

<sup>28</sup> Pen minim kun kun giy anġip anġiy anġñinimuṇ bap ma mindonimuṇ; alemb tuṅgandikiy anġniṅgamb ak, minim kun ak biynimb gok kuyip ma anġnimuṇ, nuk key kapkap Gor nup anġniṅiṅ mindonimuṇ.

<sup>29</sup> Biynimb omiṅal akaṇ, omiṅal nokom, Gor minim tep ak anġñiyakniṅ, biynimb gunap Gor minim ak yipund giy aspays akaṇ, yesek aspays anġiy, joṅimb kind ak niṅmindeniṅgiy.

<sup>30</sup> Pen biynimb yikop niṅmindeniṅgambay kun gok, gunap Gor Kawnan ak gek, gos tep paṅgyikek, bi nind tikjakiy anġonimuṇ ak, gos kun ak niṅiy bisgek, bi kisen ak tikjak anġnimuṇ.

<sup>31</sup> Kun ak nimb maṅgiysek minim tep ak, anġ dand amiy apiy giy mey, Gor nup gos ak niṅrep giy, mindrep giniṅgambim.

<sup>32</sup> Pen biynimb Gor minim anġep gok, joṅimb kiyk key kond mindyiṅ, minim anġep won ak nep apay.

<sup>33-34</sup> Yenen: Gor gek biynimb nuk gok monmon ma gipay; gos niṅyiṅ gey amek, kapkap mindrep gipay.

Pen nimb ap nan-giy, biyn gok bi rek minim ma anġniṅgiy. Bi gok anġey, biyn gok yikop niṅniṅgiy. Krays biynimb nuk miñmon okok, kun ak rek nep gipay. Baybol buk tikiyak minim ak, kunep kun ak rek nep mindip.

<sup>35</sup> Pen biyn gok minim gunap sek niṅun anġiy, korip okok amiy, nuṅgumiy sikop kuyip anġniṅey,

aṅṅñirep giniṅgiy. Lotiw namb ak biyn tikjakiy minim aṅṅñeniṅgambay, tep ma giniṅgamb.

<sup>36</sup> Akan nimb nep Gor minim ak niṅrep gipim, biynimb okok ma niṅbay?

<sup>37</sup> Biynimb Gor Kawnan yip mindpun apay gok sek, biynimb minim nup aṅgep mindpun apay gok sek yand Gor aṅgip rek nep aspiyn ak niṅniṅgiy.

<sup>38</sup> Pen biynimb gunap minim kun biy ma niṅey, minim aṅgniṅgiy ak ma niṅnimimb.

<sup>39</sup> Kun ak mam ay sikop. Gos yomb nimb ak Gor minim aṅṅñinjun aṅgiy niṅnimimb. Pen biynimb alemb tuṅgandikiy minim yimb keykey aṅgyiṅ Gor minim apay gok kuyip, kirgim ma aṅgnimimb.

<sup>40</sup> Pen kilpul aṅgyiṅ monmon ma ginimimb, niṅrep giyiṅ gem annimuṅ.

## 15

### *Krays Kumiy Tip Ak Tikjakak*

<sup>1</sup> Mam ay sikop. Krays minim aṅgenik diy mindrep gipim ak, sakiy ginimimb rek ayip aṅgiy, tip ak aṅṅñirep giniṅ gispiyn.

<sup>2</sup> Minim tep kun ak nimbip aṅgen niṅiy dipik ak mey, Gor nimbip dek, biynimb nuk mindpim. Pen mer ak biynimb nuk ma mindembikip.

<sup>3-4</sup> Minim yomb yand niṅnik ak, nimbip aṅgiy aṅgnik, “Chin tap siy tap timey gipun rek, Jiy-sis chinup nen aṅgiy kumek komey, ñin omiṅal nokom mindiy, tip tikjakak ak mey; Baybol buk ak tikiy giniṅgamb aṅgyak rek nep gak aṅgnik.”

<sup>5</sup> Pen Jiysis kumiy tip ak tikjakiy, Piyta mindek sinjak misen gek, nup nind niñak. Kisen misen gek, bi minim nup dand amemb anep wimingan ak niñyak.

<sup>6</sup> Kisen tip ak misen gek, mam ay payp handret rek niñyak. Mam ay kun gok gunap kumyak; pen mangiysek rek mindpay.

<sup>7</sup> Kisen ñin bap misen gek, Jemis niñak. Ñin bap pen, bi minim nup dand amemb gok kiyk mangiysek niñyak.

<sup>8</sup> Pen biynimb gunap nup niñyak ñin ak apiy pandikek, kisen yand kunep nup niñnik. Kun ak yand ñapan tikrep ma gipay rek bap mindenik yip dak.

<sup>9</sup> Yand bi timey biynimb nuk gok kuyip, timey yimb giyngipiyn ak; Jiysis minim nup dand amemb bap mindenim rek ma ayak ak pen;

<sup>10</sup> Gor yip simb niñiy dek, binuk mindiy, key yimb gipiyn. Bi minim nup dand amemb gunap wonḡ gipay rek ma gipiyn; yip simb niñiy direp yimb gek, wonḡ yomb yimb ak gipiyn.

<sup>11</sup> Yand nep Gor nup wonḡ ak gipiyn anḡiy ma anḡniḡḡayn; kiy nep gipay anḡiy ma anḡniḡḡayn; chin mangiysek Krays minim tep ak, ar nokom anḡñon amek, nimb niñiy dipim.

### *Biyimb Kumyak Gok Tip Tikjakningambay.*

<sup>12</sup> Pen Krays kumiy tikjakak anḡiy minim per apun ak, nimb gunap yenen ma niñiy apim, “Biyimb gok kumiy tip ak ma tikjakpay apim?”

<sup>13</sup> Pen anḡniḡḡambun kun ak, Gor Krays nup gek tip ak ma tikjakip anḡiy anḡniḡḡambun.

14 Pen Krays tip ma tikjakpikop ak, minim tep apun ak minim rek ma ayek, nup gosimb ninjy chingipik ak, ma chingipikip.

15-16 Biynimb kumiy ma tikjakep rek ayombikop, Krays nup gek ma tikjakpikop. Gor gek tikjakak minim tep per apun ak, yesek nep apnup.

17 Pen minim angnuk ak diy, Gor biynimb nuk mindpim rek ma mindembikip; biynimb tap siy tap timey giy, pisnep kumbay rek ak mindembikip.

18 Biynimb Krays nup chingiy kumyak gok, am Gor yip mindeningiy rek ma aypikop.

19 Chin Krays nup diy mey, gos sek mindpun. Pen lum ar biy mindiy, pisnep kumbinup rek ayip anjy, biynimb simbgeprek yimb gok mindombinup.

20 Pen Gor gek Krays tikjakiy nup ker amek mey, biynimb nup ker mindpun gok, kunep giningambun ak ninrep gipun.

21 Andam gek, biynimb kind nuk ak manjiysek kumbay; Krays gek, biynimb kind nuk ak manjiysek tikjakningambay.

22 Minim aspiyn kun ak, Andam biynimb kind nuk ak manjiysek kumningambay; Krays biynimb kind nuk ak manjiysek kim mindeningambun anjy aspiyn.

23 Pen Gor Krays nup nind gek tikjakiy, am nuk yip mindip ak mey, kisen apiy biynimb nup ker mindpun gok gek, manjiysek tikjakningambun.

24 Nin kun ak nin kisen yimb winingamb ak mey; biynimb, tap yerip yerip nuk kond min-

deniᅇgamb gok maᅇgiysek, Nop nup aᅇgek kond mindeniᅇgamb.

<sup>25</sup> Yenen: Krays biynimb tap okok kond mind dand amiy, Nop gek; biynimb yomb, biynimb tam okok; kichekiy, malñiluk tap yerip yerip mindip gok, Krays beᅇ okok mindeniᅇgambay.

<sup>26</sup> Ñin kun ak kunep gek, biynimb gok tip ak kumniᅇgiy rek ma ayniᅇgamb.

<sup>27</sup> Pen Nop biynimb tap okok maᅇgiysek, Ñinuk Krays beᅇ okok ayniᅇgamb aᅇgiy tikyak ak, Nop nup sek ma aᅇgyak. Nuk nep gek, Ñinuk Krays nup beᅇ okok mindeniᅇgambay.

<sup>28</sup> Chin biynimb tap okok maᅇgiysek, Ñinuk Krays beᅇ okok mindnukniᅇ, nuk aᅇgniᅇgamb, “Bapiy miñiy, nand biynimb tap okok maᅇgiysek kond mindeniᅇgamban. Yand beᅇ nip okok mindeniᅇgayn aᅇgniᅇgamb.” Kun ak mey, Nop biynimb tap okok maᅇgiysek yimb kond mindeniᅇgamb.

<sup>29</sup> Biynimb kumbay gok, tikjakniᅇgambay apiyn ak niᅇbim. Pen Gor gek ma tikjakniᅇgambay aᅇgiy, biynimb gunap yenen, numiy numam kumbay gok kuyip nen ñiᅇᅇ pikpay? Kiyk tikjakniᅇgiy aᅇgiy nep kun giniᅇgambay.

<sup>30</sup> Pen chin kunep, kumiy tikjakniᅇgambun ak niᅇiy, chinup per timey giniᅇᅇ gipay ak, gos yomb ma niᅇbun.

<sup>31</sup> Minek minek Gor nup aᅇgniᅇyiᅇᅇ apiyn, “Kumniᅇᅇ kumniᅇgayn. Minim ma mindip apiyn.” Yand nep Gor minim aᅇᅇenik niᅇiy dipik ak mey, biynimb mapin yand mindpim. Nimbip niᅇind apiyn.

<sup>32</sup> Pen miñmon Yipiy ses biy apiy, minim tep ak anğñiyn anğiy, kayn ayndik gok yip penpen gipiyn. Biynimb gunap apay rek, kumiy pisnep kumningambun anğiy apnıp ak; “Miñiy mindpun ñin biy, tap tep tep ñimbyıng, ñıng kilis ñimbyıng gi mindonjun; kumiy pisnep kumningambun apnıp.”

<sup>33</sup> Pen biynimb gos kun ak rek niñbay gok, yip ma mindenimimb. Biynimb mindrep gipay gok, biynimb timey gipay gok yip yıngonğ giy, ar kun ak nep giniñgambay.

<sup>34</sup> Pen gos key niñiy timey gipim ak kirgiy, mindrep ginimimb. Nimb gunap Gor nup gosimb ak ma niñbim ak pen; nambin ma gip.

### *Tip Ak Tikjakiy Key Yimb Mindpay*

<sup>35</sup> Pen nimb gunap, biynimb kumbay gok yergiy rek tikjakniñgambay; mumbwak kiyk ak yerip rek mindeniñgamb anğiy niñbim?

<sup>36</sup> Nimbip sakiy ayek kun giy niñbim! Tap yin mañgiy gok yokon, wak ak sek mindiy ma jakip; kuyıng yapıy nep jakip.

<sup>37</sup> Pen lays mañgiy, wiyt mañgiy akan, tap yerip mañgiy yokpun ak, jak yomb gip rek ma jiw yimbun; mañgiy sikoy gok nep yokon jakip.

<sup>38</sup> Pen mañgiy keykey yokpun kun gok, Gor jaknimun anğiy niñayak rek jakip.

<sup>39</sup> Mumbwak gok kunep keykey mindip. Biynimb gok key ayak; kimin, kayn, kanj gok key ayak; piys gok key ayak; yakir gok key ayak.

<sup>40</sup> Mumbwak man ar biy ker gok key mindip; semb biyon ker gok key mindip. Man ar biy ker

tep ñiluknimb gok key mindip; semb biyon ker tep ñiluknimb gok key yimb mindip.

<sup>41</sup> Pen pumb melik tep ak key ay, takin melik tep ak key ayak. Gap melik tep ak key mindip. Pen gap gok kunep keykey mindip.

<sup>42</sup> Biynimb kumiy tikjакpay mey, kun ak rek. Kumon kaw dинgambay mumbwak ak key mindip; tikjakiy per mindoningambun mumbwak ak key mindeningamb.

<sup>43</sup> Kaw dipay mumbwak ak perper mindonimuj rek ma ayip. Tikjakningambun mumbwak tep yimb ak, Gor yip perper mindeningamb.

<sup>44</sup> Lum ar biy mumbwak mindip rek kumbun; tikjakning mumbwak tep ak diy, tikjakningambun. Gor chinup mumbwak lum ar biy gayek mindpun rek ak; nuk yip mindep ak, kunep gayek mindeningambun.

<sup>45</sup> Baybol buk tikiy angyak, “Gor Andam nup gay, menг mingan pungek, añin ay, biyimb ayak angyak.” Pen Andam kisenimb ak nuk key Kawnan ak mey, biynimb gek perper mindeningambay.

<sup>46</sup> Kun ak mey, nind mumbwak yikop ak diy mindiy; kisen Gor yip mindep mumbwak tep ak dинgambun.

<sup>47-48</sup> Bi Andam nindnimb ak man ar biy nimb; bi Andam kisenimb ak semb biyon nimb. Biynimb mangiysek Andam nup man diy, gayek mindyngip rek mindpay; pen biynimb Krays nup dipay gok, nuk semb biyon mindip rek ak mindeningambay.

<sup>49</sup> Miñiy mindpun ak, Gor man diy gayak bi

ak rek mindpun; pen kisen Bi semb biyoŋ nimb awak ak rek mindeniŋgambun.

<sup>50</sup> Mam ay sikop. Nimbip aspiyn: mumbwak yikop ak, Gor biynimb nuk diy kond mindeniŋgamb namb ak, amnimuŋ rek ma ayip. Tap kasek tokiy ay kum kuyiŋ yowip ak, perper mindonimuŋ rek ma ayip.

<sup>51</sup> Pen nimbip minim ma niŋyiŋgipay bap aŋgning gispiyn. Chin Krays biynimb nuk mindpun gok maŋgiysek ma kumniŋgambun. Gunap kumiy, mumbwak kisenimb diniŋgambun; gunap kim mindiy, mumbwak kisenimb ak diniŋgambun.

<sup>52</sup> Ñin kun ak biykul kisen ak aŋgek, kasek aŋiŋak rek diy, biynimb nuk kumniŋgambun gok, mindoniŋgambun gok maŋgiysek, mumbwak kisenimb ak diniŋgambun.

<sup>53</sup> Mumbwak chin kuyiŋ yowep ak perper mindonimuŋ rek ma ayip; pen miŋiy mindip ak gek, kim kisenimb ayek mey, perper mindonimuŋ rek ayiŋgamb.

<sup>54</sup> Ñin kun ak minim tikiy aŋgyak rek giniŋgamb. Minim kun ak tikiy aŋgyak, “Biynimb kumyiŋgipay rek ma kumniŋgambay aŋgyak.”

<sup>55</sup> Pen biynimb ma kumniŋgambay rek kamep bap tikyak ak, Gor aŋgak, “Kilis nand akay? Chim yakam nand akay mindok, biynimb yip gok gey kumniŋgambay?”

<sup>56</sup> Low mindakniŋ, tap siy tap timey gipun gok, tap yomb yimb ayek, pisnep kumemb rek ayip.

<sup>57</sup> Pen Gor chinup aŋgiy, Jiysis Krays nup yokek apek, biynimb nup ker mindpun gok, kumiy pis-



nep ma kumningambun; tikjakningambun. Kun ak ninjy, Gor nup tep anjgun.

<sup>58</sup> Pen mam ay tep yand gok. Gor nup ma kirginjun; chingiy nep mindenjun. Kumiy tikjakningambun anjgy, gos sek mindiy, nup direp giying nep mindenjun.

## 16

### *Opriy Gunap Dayrep Genimimb*

<sup>1</sup> Gor biynimb nuk Jerusalem mindpay gok kuyip yiwan yomb apek; maniy di nan-giy ñiningambim minim ak, anjning gispiyn. Gor biynimb nuk miñmon yomb Galesiya sek, miñmon sikoy kun okok sek kuyip angen, giyak rek nimb kunep ginimimb.

<sup>2</sup> Nimb mañgysek maniy yerip yerip dipim ak ninjy, Sandey ñin gok gunap di nan-genimimb mey; mindpim ak amjakiy, maniy nen ma angranjenim.

<sup>3</sup> Pen ñin kun ak, bi nimb key ninem tep gip gok anjgy, maniy kun ak minj sek tikñem, dand Jerusalem amningiy.

<sup>4</sup> Pen yip amemb rek ayek, yand yip anningambun.

<sup>5</sup> Masedoniya propens amning gispiyn rek, kun okok amiy, mindpim ak niningayn.

<sup>6</sup> Nimb yip sikoy won bap mindenim rek ayip. Yombip ayip ñin biy nimb yip mindiy, amning yip dam kinjenamb ak yokem amningayn.

<sup>7</sup> Nimbip am kirak ninjy amemb ak, yip tep ma gip. Biyomb chin ak yaw anjek, tapin mindiy amningayn.

<sup>8</sup> Yand miñmon Yipiyses biy mindiy, Pendiynos ñin yomb ak apiy pandikek kisen niningayn.

<sup>9</sup> Miñmon kun biy, biynimb yip yiruk niñbay gok kuñay mindpay ak pen, Gor woñg tep ak kuñay mindip.

<sup>10</sup> Pen Timotiy mindpim ak apek, nup direp gem, ma piriknimun. Nuk yand Biyomb anup woñg gipiyn rek nep gip ak niñy,

<sup>11</sup> ma kirginimimb. Mañgiyse nup direp gem mindiy, kisen amning, dap kinjenamb ak yokem, mam ay gunap yip mindpiyn biy winingiy.

<sup>12</sup> Pen mam Apolas nup nembnemb giying apiyn; mam gunap Koriyn amjipay rek, yip amimin apiyn ak pen, nuk miñy ma niningamb. Kisen nemb rek ayek niningamb.

### *Minim Day Gunap Sek Angak*

<sup>13</sup> Niñying mindenimimb. Gor nup gosimb niñmindiy, ma piriknimimb. Nup chingrep giy,

<sup>14</sup> biynimb wasemb ayep ar ak gem amnimun.

<sup>15-16</sup> Mam ay sikop. Nimb niñbim; Griyk kay Krays nup diyak gok, Stepanas biynimb kind nuk ak nind diyak. Diy mey, biynimb Gor ker gok kuyip wasemb ay, direp giying nep mindpay. Biynimb yand gok nimbip asiyn; biynimb tep kun gok rek niñy, angningiy rek nep ginimimb.

<sup>17</sup> Pen nimb ap yip niñnimimb rek ma ayek; Stepanas, Potiwnatas, Akaykas ap yip niñbay ak, yip tep yimb gip.

<sup>18</sup> Gipay kun ak, chinup mañgiyse tep gip rek, kuyip wasemb ayjun.

<sup>19</sup> Pen biynimb Gor ker mindpay miñmon keykey Esiya propens biy, nimbip Koriyn kay,

“Mindpim?” apay. Akiwiyla biynuk Priysiyla sek, Koriyn biynimb akniy mindpay gok sek apay, “Gor nimbip kond mindonimuj apay.” Biynimb ap korip kuyip ber lotiw gipay gok kunep apay.

<sup>20</sup> Pen mam ay manjyse, “Nimb mindpim?” apay. Chin Gor biynimb nuk gipun rek, nimb manjyse penpen ñin piksaknimimb.

<sup>21</sup> Yand Pol, minim day won biy ñin manjy yand ak key tikiy “Nimb mindpim?” aspiyn.

<sup>22</sup> Biynimb Gor nup gosimb ma niñningiy gok yiwur yomb diniñiy. Biyomb chin ak kasek winimuj!

<sup>23</sup> Biyomb chin Jiysis, nimbip simb niñiy direp ginimuj.

<sup>24</sup> Yand Jiysis Krays binuk mindpiyn ak, nimbip manjyse wasemb aypiyn.

**Kalam Baybol Buk Gor minim nuk kisin  
angayak  
The New Testament in the Kalam Language of Papua  
New Guinea  
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

---

PDF generated using Haiola and XeLaTeX on 18 Apr 2025 from source files dated 31 Aug 2023

1491c109-3ee2-5565-9b83-06c480168547